

清容居士集

冊三



清容居士集卷第九

元 袁 桷 譔

律詩五言

次韻善之雜興七首

習隱漸成癖，苔光綠映扉。避名常好好，絕俗任非非。日落長鑿柄，天寒白苧衣。南鵬五月息，戢翼笑羣飛。

萬事不滿笑，書林盡歲娛。未須夸得意，底用哭窮途。細雨看移竹，秋風學鱸鱸。百年真急景，醉入壁間壺。

昔日登臨地，狂歌祇自求。漢宮空有恨，吳女不知愁。雲葉寒沙霽，江花古岸秋。何人持鐵板，敲徹舊邊樓。

學道常無寐，披衣聽曉笳。精勤慕柏大，詭幻笑欒巴。丹熟抽金汞，窗明鍊玉沙。

微陽端有候，一點應吹葭。

善之近學參同契故戲及之

臥遊元不惡，佳處絕榮枯。雲憶東西寺，山看大小孤。行年須白社，失意付黃壚。

何事遼東鶴空悲景物殊

鄧子清如竹蕭蕭澹世情下帷鄰草色倚杖愛松聲嗜癖成書賈身窮付筆耕
乘槎空有約何日海邊城

書聲連古巷疑是白雲廬吟苦眠料理塵深靜破除詞華輕大曆風雅近黃初
顧我相知舊艱難愧不如

月黑

月黑斗杓轉昏昏古柳壕干掬寒戍響窅堵亂烏號風定歸潮急門深落葉高
向來江上意無語獨蕭騷

次韻題林隱

移家鄰縣去住久不知年花擁檐前樹泉歸澗下田丹芽承露浴石乳拾松煎
擬欲題新竹才疎愧惠連

次韻上官伯圭夜坐觀梅二首

愛酒嫌劇飲天寒但欲眠烏啼千樹外雁過一燈前霜角悲涼調風幡自在禪

平生江海意袖手送殘年

江梅元楚楚冰雪總相宜肯佐金樽舞寧辭玉笛吹天心元自正地脈本無私
不盡關山意巡檐與賦詩

題柯自牧救荒記

曾聞於越地千里草青青比屋呼庚癸連年厄丙丁已傳青社記不用峴山銘
近說天台宅新成太祝廳

壽高舜元父二首

喜見黃鐘月重推絳縣年雪窗温鼎火春甕養壺天朝市成真隱階庭擁壽仙
時吟五字律獨立晚風前

玩易喜心清年高見太平杖扶靈壽穩松削養和輕夜月前朝事春風九老盟
初筵慚後至立雪捧深觥

打灘

老石太古色遊魚新水姿輕冰養流汞急瀑散飛碁角力誰爲挽臨流亦自移

南來多此意北望莫相疑

春陰

寂寂春陰半南來未識花故鄉憶寒食細雨摘新茶物色供詩句風沙入鬢華
山林元未改客路獨烏紗

懷城南諸友二首

春至長爲客愁多始憶君風程江北路水驛海東雲杜宇深深怨醪醲淡淡醺
行藏曾共數不是故離羣
養性深辭酒全交淺作書寧知故人厚自愧後生疎春入黃河道雲分碧鳥居
江湖從浩蕩不敢愛吾廬

舟中雜書五首

野色連雲白春聲引樹清遊魚新浪急歸鳥片帆輕曉夢三千里風餐第幾程
萍蓬元未穩徙倚問天明

挂席疎星外停舟獨柳邊團團風始陣帖帖月初弦隴曲沙成雪吳歌水拍天

行藏有如此把卷獨悠然

春睡元無著鄉心比酒醲
飛花空有意小雨不成容
獨樹疑新堠羣鴉似亂峯
艱難憐浩蕩散髮遂初慵

河落渾無底飄零總客塵
春洲蘆雁少曉戶柘蠶勻
京洛饒豐稔江湖樂賤貧
低徊吾不恨應有故山筠

桑柘斜陽道天然錦繡機
雲容催溽暑花片憶春霏
水落新魚瘦風清宿麥肥
歸程時屈指重午試生衣

淮浦

淮水奔如箭舟維岸屢移
斷岡封馬鬣落雁陣魚麗
白葦前朝界青帘古戍基
亂離今已矣風物漸熙熙

立春日宿大清口舟中見新月二鼓雪作

春月如佳士翩翩欲上船
相逢疑昨日一別又新年
水鏡心胸朗空輪體質全
更深飛雪急直與鬪清妍

次韻陳剛中待制初秋二首

碧樹晚雲餘秋聲入客廬知公吟蟋蟀勸我憶鱸魚宦味元無著鄉心得未疎
清塵滿雙鬢蕭瑟不禁梳

岸幘倚書楹寒砧徹四城馬歸人獨語雁過月初生寂寂候蟲急淒淒落葉清
客懷誰與共搔首見參橫

送牟元通歸瀘州

西州人物論翁季擅清門已暗金牛路猶傳鐵騎孫巴江雲不盡蜀嶺雪空存
邂逅衣冠聚艱難得共論

夜夢作詩覺因足後韻

薄酒薄於水濃山濃似春梁間雙語燕天外獨歸人細柳千重緒飛花一寸塵
碧窗初睡醒新月寫清真

淮陰大風

極目虛無裏飄飄萬馬馳飛蓬旋橐籥虛谷應墳簾春樹元無著晴雲復自持

倚舟沙際穩歸雁得相隨

題温州太守德政詩後

海郡炎歊重涼風起素秋飛蝗分界去鳴鶴下陂遊白布官租減黃甘雅詠酬
兒童多好語竹馬擁君留

次韻馬伯庸春思兼簡繼學二首

洛花千萬朵一一爲君開粟暈排金縷酥凝爛玉杯美人乘馬至仙子抱琴來
莫學飛紅似隨風喚不迴

行窩春匝匝下榻望君來雙玉矜嬌思聯鑣騁逸才題詩紅袖擁傳詔錦袍迴
羞殺高眠者楊花滿綠苔

送秦巖卿從事出宰北平縣

高秋右北平出宰樂時清白水前朝界黃雲舊塞城彈琴看雁過束帶候雞鳴
不盡平蕪際題詩倚馬成

黃河口

徐州城西北隅與黃樓相衝今從此南流

河落流沙駛茫茫禹甸周昔聞傳北載今已絕東流俊鷗辭高下輕鷗擅去留
百年文采盡日落認黃樓

徐中丞母八十

謝庭森玉樹漢闕賜金花懿德傳家盛耆年舉世誇晴萱當檻直冬筍隔籬斜
拭目諸孫秀翩翩佩紫緇

送張榮澤

斂板滎陽縣栽花接早春水新魚子散雪釋馬蹄勻政可箋河伯何須詠洛神
桑田今幾許除籍補疲民

贈瑛上人住洞林

托鉢千巖裏松花凍未開哀猿依依講席飢鳥下生臺潭影留雲定鐘聲送月回
山中太古雪爲寄一瓢來

送周南翁集賢南歸省墓

搖曳十洲仙來尋楚尾船金花榮故里石筍表新阡江橘團霜重冰魚繪雪鮮

塔前雙玉好行賦鹿鳴篇

潞公判永興遊嵩之詩見於翰墨然卒與右軍之遊汶大率相類名爲造物所忌豈虛語哉今見其孫璋甫佐西省甘棠遺思至是殆將見之渭水落葉盡往來餘碧鷗龍門七十里雁塔一千秋弔古麒麟塚衝風驪驪裘寒蕪明滅處遮馬見君留

劉氏集慶堂

華構出層林春浮院宇深小桃分雜佩新燕掠鳴琴石乳千年潤松花百尺陰紫皇方問道那許遂歸心

送蘇子寧和林郎中二首

貂帽護寒沙冰天閱歲華斷溪駝聽水密雪犬行車雲盡難尋雁春深未識花昔人奇絕處八月解乘槎

往歲經遊地寒蕪碧燐深雲開山後陣水咽隴頭吟雪白氈房重天青羽檄沈重華新雨露悲喜候車音

蘇子寧北行詩二首

出塞黃雲盡經春白雪多高樓閒鼓角絕域靜干戈風急盤鵬嶺冰深飲馬河
征鞍遲明發揮手渭城歌

去去居庸道關山冬氣深雪天孤帳宿寒月一笳吟石堞棲鴉穩沙場過雁沈
粉闌多暇日歸騎有佳音

吳閒閒病起二首

好客頻來往閒雲管送迎花香清病骨松籟答書聲身世三生夢乾坤萬古情
故園多蕨筍歸興繞江城

客散庭如水春深日似年閒心觀宇宙浮世閱風煙詩句吟難穩蒲團坐欲穿
一聲松外鶴此意共悠然

題蔚州郭氏永寧亭

華亭絕市囂山崦映峯曉落葉燃茶鼎長松挂酒瓢天低雲欲下春盡雪初消
歲晚無王事前村看射鵰

次韻馬伯庸題凌波仙圖

玉衣朝岱日寶瑟寫湘雲宛轉鸞歸憶參差雁過聞石痕生左角松影印迴紋
倚竹憐雙泣摘蘭憫自焚停驂沙磧近指點認昭君

伯庸以詩見屬次韻二首

學古陳言少官清雅詠多珠玕明玉海寶鑑挹金波易賴韋編定書疑汗簡訛
斯文今有託爲我補嘉禾

聽君人物論閱世似難多學禮師倉海傳家繼伏波看山窮北戒惜日愛南訛
彩鳳非無食瓊山自有禾

高掾祖父八十

心跡混漁樵門深絕市囂花前歌舊曲燈下話先朝白髮書千卷朱顏酒一瓢
有孫遊玉署從此樂逍遙

長春道士禱雨有應

清夜轉崑崙天雷卓午聞平林千樹響古澗百泉分門靜堆黃葉山空聳白雲

神功滿禾黍尸坐答鑪熏

次韻馬御史題漢州喻氏多勝亭

花壓金橋重春風第一州江喧朝灌口雲擁護遨頭雁落沙中渚鶻啼竹外洲

使君燈火地爲我倚高樓

鶴山年少時守漢州元夕張燈金雁橋斷

次韻伯庸過天寶宮

松暝碧雲深鶴歸人倦尋朝迴香滿室祠罷月盈襟白鳥分山影黃鸝轉樹陰
小溪流不歇咽咽似鳴琴

送白誠之赴台州別駕

岩繞巾子峯市近海潮通桂樹團雲濕松花帶露濃猿隨僧屐雨鷗送賈帆風
盡道無王事持杯百過空

贈瞽者

尸坐包玄象虛窗萬籟沈聽泉知地脈候琯合天心風定馬蹄急霜清葉落深
弄丸端可學從此罷鳴琴

送成公履守光州

淮樹連空碧，淮山徹底清。
濯纓羞戀闕，佩印樂專城。
曬網雲催泊，提壺雨勸耕。
地偏王事簡，數雁寫琴聲。

寄開元奎律師五首

開元古壇主，盡日着袈裟。
社主勤供菜，天神罷送花。
蒲團黃葉護，香鼎白雲遮。
終歲無王事，緇經到日斜。

開元古壇主，老至律精嚴。
洗鉢魚遊水，開門鶴入簾。
拾薪供茗具，滴露寫經籤。
已悟如來意，看花不用拈。

開元古壇主，身世兩相忘。
客至常扃戶，僧來不下牀。
神光千里鶻，玄辨九秋霜。
白葉渾消盡，蓮池任意香。

開元古壇主，瓦石化丹青。
似住元非住，無營類有營。
念珠金的磔，戒鉢鐵晶熒。
我亦慚塵垢，清齋養性靈。

開元古壇主，幼歲已相聞。
我竟飄京國，師方玩水雲。
一官千日計，萬事五更分。

共約修蓮社空林洗垢空

髻鬢侍諸父拜雙峯祠堂未嘗敢有題詠二十年來接武于玉堂瀛洲

霜露之思缺然有覩近聞平石長老與廢補仆光紹前聞遂迷舊懷為

六詩且申歎仰

沈沈大士閣千嶂萬夫降近樹青禽獨前松白鶴雙雲霞生几席星斗列軒窗

俛首京塵客生涯愧老龐

慚愧雙峯老光明兩足尊

新妝釋迦佛像

午窗鈎竹影凍筆點梅魂齋近烏啼樹禪迴

虎伏門春來有新雁勸我趣歸轅

經院辛勤日千金記始興

創寺時以賜金千兩經始今八十有四年

兩荒蟲蝕拱壁壞鼠緣藤舊觀

丹青復諸天錦繡承短簷增突兀會見出盧能

書來修選僧堂舊有術士言太高稗沙門減其柱然清班亦不

聞有顯者故末及之

陰陰虞監宅

虞永興宅

鬱鬱越公祠掬水不入獻布金猶受疑流年翁仲守往事茲

葛知澗水交流處曾傳玉帶垂

寒徹清泉底山童上水華定金非在井羅暉羅尊者語傳昔有一女子墜釵其水遂定煮米卻成沙洗
目能生電搜腸可當茶人持一月去此月落誰家

跣趺千樹暝彈指百花春道以東巖的詩於北澗新歸雲呈住相行籜掃空塵
靈鷲誰公論啼猿正惱人

次韻張希孟凝雲石十詠

我愛凝雲好神交萬化前碧窗圍蜃氣黑浪袞蛟涎化石知何代出山今幾年
相從清思長寸穎起蒼煙

我愛凝雲好飛塵萬馬驅雄深麾將士峭直傲公孤斷足鼈分極摩牙虎負嵎
何年化霖兩慎勿竟虛無

我愛凝雲好雍容諫諍姿虛中超混沌正色走窮奇潤物非無意成功自有時
棲遲元未晚清坐愧神癡

我愛凝雲好氤氳萬象深鎮浮廊廟體閱靜雪霜心屈曲蜂房綴玲瓏蟻穴淫
玉京誇獨秀此日汗腰金

我愛凝雲好朝昏境不同金芽養靈谷鐵網起晴空月色古今正潮痕子午中
點頭那有異吾欲問生公

我愛凝雲好神清湛欲留岷峨千古雪泰華一天秋獨鶴離羣皎層冰出澗幽
無言有深抱山立正陽休

我愛凝雲好模糊老墨仙癡墓端食月渴驥欲奔泉守黑壺中日談玄洞裏天
煙霞元自足塵世未爲賢

我愛凝雲好翛然一榻棲支機何物誕醒酒此君低香遠能爲霧泉深解作溪
未須鄰綺角端可比夷齊

我愛凝雲好能歸萬古春遺簪三島客椎髻八蠻臣柏子添清供梅花寫舊真
天心元不動東海任揚塵

我愛凝雲好蒼龍擘破飛振纓悲濁垢整珮謁清微歲月江翻浪冰霜玉韞暉
黃塵今幾許且勿展書闥

樹重雲光溼峯寒曉氣清抱琴人欲往門暗客相迎凍雨生寒溜深雲倚怪藤
蹇驢吟不得指點墨千層

淇綠堂

卜築荆溪下碧陰生晝涼軒昂丈人行瀟灑此君鄉月候緱山鶴雲催嶰谷凰
衛風朝夕誦底用別詞章

寄砥長老

雙峯不受暑傑閣稱幽禪蕉葉綠雲扇藤花白雪氈見龍增澗水喜雁點江天
笑我開平客于今第幾年

送李希白降香武當山

絕壁通靈籟天香簇寶華重明應龍馬習坎伏龜蛇度嶺金盤日穿雲玉佩霞
道逢采苓叟應與論南華

送永新王東野還里

天際風花黑燈前鬢影蒼方刊肘後祕金散橐中裝某樹童年種茲丘晚歲藏

已忘朝野事飛鷺起鳴榔

輞川圖

詩中傳畫意畫裏見詩餘山色無還有雲光卷復舒
前溪漁父宿舊宅梵王居
千古風流在披圖儼起予

贈雪窗上人

少日觀滄海陰山恨未登飢餐太古雪渴飲萬年冰
柳色迷官道鐘聲動客燈
聞聞與見見問我一枝藤

直沽口

二水赴滄海客行殊未休漁舟維病鶴歸棹起輕鷗
兩重雲光溼天低樹色浮
京塵今已洗從此問菟裘

三月廿九日阻風馮家口

飄泊春風怒維舟古渡濱防堤堆馬鬣盛浪捲龍鱗
撇掠吞吳陣紛披障庾塵

柳陰亭午轉人靜白鷗馴

次韻劉明叟

欲知行路苦孤雁促歸期矮屋燈昏際空林葉落時滄浪誰欸乃襜褕笑詵癡
點檢韋囊裏珠璣總屬詩

壽閻承旨三十韻

寶曆書堯甲蒼杓指夏辰脩齡天保魯嘉瑞嶽生申人物中州正陶鈞淑氣淳
舒晴翹孔翠墮地擢麒麟藻思傳髻綺蜚聲起搢紳文鋪崑玉鏤賦約楚蘭紉
樂道車中聘談經席上珍飛牋油幕佐執簡柏臺賓黻開丹地絲綸演紫宸
慶雲圖遠牒甘澤洗荒塵評論空餘子儀刑倚重臣昂昂霄漢表皎皎雪霜身
滄海鷗忘慮長風驥絕倫名高諸彥避德盛後生親朗鑒中秋月天和太古春
精忠言款款獎引語諄諄書葉題文債詩筒破酒巡筆翻金井凍詞吐露桃新
格律常楊陋篇章鮑謝鄰辛勤憐我輩銓賞屬斯人南極呈黃道東皇挾絳輪
霓旌紛旖旎香鼎秀氤氳果熟分金母丹成養谷神心澄眸轉碧光瑩頰浮銀
物色歸青簡年華閱大椿小車花外影馴鶴竹間真賀履聯行整傳觴捧勸頻

疎闕看遠岫虛靜傲蒼筠往事雲舒卷流年肘屈伸長生端可學靈壽不須陳

次韻仲章過陳氏城南書隱十韻

矮屋參差倚平蕪黯淡看夢迴榆塞遠愁絕翠峯寒白髮游絲罽丹心古鏡蟠
槐明金瑣碎菊鑄玉巘岫憶月時看劍臨風復整冠鄉音憐過雁古調拂離鸞
去矣歌招隱終焉樂考槃晚知交態薄老識宦途難口腹非真累毋煩饋一簞

入南城遇老醫言山陽舊事因成十六韻

邂逅山陽老相傳事已訛姦雄歸草莽天地入悲歌太守籌謀誤將軍禮數苛
韃橐同下吏騶御失前珂渙忍顏如此憑陵事若何比肩身肯辱卻立齒爭摩
水捲寒雲甲風揮白日戈耳聞人作膾眼見血成河翕霍同么子倉皇類小蟠

官軍奔及馬婦女走乘驟自古儒冠忤難將杯酒和功成真草草先公在宥府論山陽事去

國後維揚論功咸謂偶幸時至復峨峨漂母恩徒快中郎詠未磨荀羨為中郎將有北征詩遺屯迷鼈石

鄧艾所築舊浴暗龍渦土沃村村麥湖深處處荷人生貴行樂何必問銅駝

壽致政王侍郎八十二韻

壽俊標周士儀刑望魯儒朝川饒詠賦璜水祕謀謨壯歲丰神整明時撫仕殊
東曹誇鶻擊公府羨鳧趨審象三韓使含章四皓圖長身昂野鶴正色叱妖狐
誓墓文何早傳家計豈迂鄉稱三老舊人說二難俱舍並分桃塢田開別芋區
水邊時避飲月下屢嗔扶眼碧看山媚鬚銀映雪癯油車懸蹠躩野服綴襜褕
社肉時相餽春醪不用沽綵衣新稚子椎髻古奚奴鼓擊深深舞茶烹緩緩呼
花飛迷去路鳥下避行廚南極珠分瑞東泉斗借酌造朝看賜杖入里記垂弧
翠柏根如石靈龜息自腴從今躋壽域底用詫康衢

壽牟獻之大理卿七十三韻

氣概岷山秀風神閩苑仙西州餘故老南國挺真賢瑞靄垂弧日人思衣繡年
清門開臺慶綠籍紀齡延止息功參易虛心體合玄厖眉垂素手漆髮換華顛
令歲七十眉間忽
生兩毫髮重黑鳩杖何期賜牛車不待懸三鱣傳素緒一鶴記青氎粉社爭

爲壽蘭堦數擊鮮風驂追廣莫雲珮憶鈞天往事清霜木希音太古絃五更尊

禮絕六老舊堂專

所居正六
老堂遺址

杞菊調饗鼎丹砂養井泉慵書乞米帖羞辦買山

錢醉劇簪花舞遊疲枕石眠黃公終慕隱白傅且逃禪文物傳青史耆英入繪
編弁山寒戢戢茗水響娟娟望海傾朝夕瞻星候次躔登龍身未武執雉意空
傳偏仄徒多恨低違祇自纏窮鄉真坐井陋室強懷鉛夜月思延桂秋風學詠
荃終然羞弱植復爾滯孤鸞問字瓶空在傳經席未前牛衣期振拔馬磨費評
詮冰柱垂青嶂蠙珠湛碧淵至言機已息妙技目無全凡質丹須換精誠溜合
穿遡風輪善頌立雪冀敷宣

壽李承旨四十韻

寶曆開三稷瓊章集萬神蒼龍迴插子玉兔候交辰潞水丹騰渚壺關氣接旻
道傳莘野正學比傅巖醇帝運昌文統師臣秉國鈞清宮高贊畫潛邸舊經綸
意得超今古才雄異等倫春浮霞錯落秋映玉嶙峋三執中書柄重開大國昀
黃鍾陽脈脈瑤圃霧氤氳仙鼎神膏祕宮壺掌露真恩醲錫麟脯味薄謝猩脣
瞳碧光流漆顏紅色耀銀垂紳凝泰嶽設席陋平津手挈重華古心追貞觀新
至人專上壽八表樂同仁非虎耆年並猶龍祖譜親息深忘蜨化機靜狎鷗馴

蕩蕩心無競，肫肫俗易淳。極知調鼎鍊，不惜汗車茵。竹帛千年事，桑麻萬里春。
管商謀可鄙，房杜跡常遵。斟酌扶元氣，彌縫護國珍。倚風憐竹弱，聽雪喜松皴。
玉署親裁詔，青蒲獨奉宸。蜀江移戍罷，浙土減租勻。榻淨唯烏几，堂虛且角巾。
手揮廷下吏，目送幕中賓。習隱時思許，題詩尚憶秦。黍田溪溜溜，花塢澗粼粼。
問俗停車緩，貪賢倒屣頻。藥囊儲赤箭，水鑑徹青蘋。滄海收毫末，空林絕隱淪。
籍功文館定，約法論堂詢。出處關吾道，安危佩一身。政須陳蹇蹇，直與紀麟麟。
績蕤慚班馬，抽才頌甫申。占天徒有管，望冶眇無垠。閱歲桃成實，知年海拂塵。
扶疎慚小草，葱蒨託靈椿。

送文子方著作受交趾使于武昌長律二十韻

萬里蠻陬貢，清秋督使馳。乘車專述命，受幣聽陳辭。紫舌音聲狡，雕題聚族滋。
玉門心愈遜，銅柱約難移。江漢尊南服，星辰拱太儀。趨庭輸齒革，授館列膏脂。
私覲情鈎隱，公言理折疵。彈丸空有險，束矢定無疑。桂蠹消煩溽，著龜審事宜。
要荒工跌宕，保障慎羈縻。鸚鵡寒汀遠，蒹葭晚岸欹。壯遊詩句豁，古戍角聲悲。

月矗朱簾正山低翠浪欺班超空耿耿陸賈政怡怡楚水愁腸結衡峯望眼眇
過門王事急去魯驛程遲緬想垂衣治深求備袞資大夫謀可利小客禮須持
諭蜀徒煩檄平南漫擬碑佇看王會傳端假史臣爲

魯子翬御史分按遼陽作長律五十韻愛其精密予今歲亦扈蹕開平
因次其韻

象御天街正烏輪海觀昇省方秋戒慎扈蹕歲因仍石迸根駢拇山迴勢左肱
塵深疑帽重霧密覺衣蒸午頓炊難熟食征酒易勝解鞍心悵悵執轡念兢兢
酪水分罌缶通薪算斗升皮毛均製服脂腠或然燈統幕迷高下烽臺閱廢興
度關泉水咽出口月華澄狼戾官芻峙魚麗鐸粟徵千房雲疊疊萬竈墨層層
列帳排衣甲行營護棘矜旆旋環似翼鼓發去如繩斗北瞻紅棧雲西指白登
草肥青穰稭松聳翠峻嶒積雪疑忘象搏風訝徙鵬屬車攢幄帳行殿儼茵憑
白氎時逢賈朱衣定指僧翠旄逼華蓋金甕耀觚稜觀闕天經界儀臺象緯凭
攸飛拳似虎鐵杖足如能竹帛司常煥丹青職貢增會朝珠帽簇錫宴寶卮凝

陞立齊垂橐師行陋釋摺廣寒通月窟高爽寄涼檜上聖英資異丁年武德弘
天戈中夜渡星檄百川承同軌嚴行夏明裡恥用鄮別州端首冀分器定先滕
德啓無疆服光傳有道曾皇威宣絕漠陽澤散堅冰表正辰居所漸仁水集瑚
庭開下鳴鳳苑廢罷飛鷹舉逸尊加璧掄才鄙販繒鄧林搜入柱瀛海取三凌
曲學慚繩祖孤聞賴得朋沈思雲外弋冥索澤中留客議雞同鶴人疑驥聚蠅
濡毫終有思執簡豈無懲謂可兼遐邇胡云立愛憎清芬蘭佩結芳薦蕙殺烝
鴻筆吾誠忝輜軒子累乘共知心耿耿相對髮髻髻馬磨誰憐許龍門共企膺
枚生詞過實揚子德徒稱盛化乾坤闢王綱日月恆麟符昭炳蔚豹霧駭超騰
虛白難爲繪空青不受贈欲追千古筆爲付一枝藤

王趙公八十應制十韻

耆德膺熙洽皇風協泰和公明旁作穆帝念敘惟歌粉社新封土蓬壺舊隱窩
黃公資輔翼白傅退婆娑望日靈龜息擎雲古柏柯精神霞炯炯儀觀玉峨峨
設醴樽浮蟻兼珍釜錫駝擁牀爭置笏立馬會鳴珂服食丹藏井絲綸錦簇窠

永須依日月何必問煙蘿

壽開府承旨十韻

泰嶽舒紅日天門爛紫霞
氤氲生宰輔磅礴贊亨嘉
文武揚中外寬嚴接邇遐
遊嵩雲擁馭度磧雪飛沙
畫戟車流水青編筆有花
精神春不老器守海無涯
玉殿彌綸重金鑾密勿華
傳宣花似斗錫宴棗如瓜
上壽三千歲元勳第一家
山河開賜履早晚聽宣麻

劉邢公九十應制十二韻

賜履光華閱延齡冠帝畿
氤氲秋霽嶽菌蠹露凝芝
六聖存遺老千官介壽祺
傳宣鳩飾杖錫宴蟻浮卮
餐玉銀鎔頰簪花翠壓眉
灌陰機帖帖擊壤樂熙熙
坐石雲生窟澆槐水溜池
霜深風脫木冬暖凍消梨
往事先朝夢多情舊日詞
魯公方拜後鬻子定爲師
用拙長年櫟虛心太古著
成功全靖退樂道過期頤

次韻伯庸畫松十韻

妙思通靈素玄陰接帝青
抗顏躬蹇蹇蒙頂髮星星
颯爽龍羞豢蕭疎鶴鍊形

壁虛生地籟斗近界天經
蜨夢春濤湧蟲疑曉日冥
雲生停翠候風入倚窗聽
屈曲車連軫騰擎簏列庭
戀鄉思海岱封爵鄙云亭
月落孫生嘯天寒屈子醒
雄姿輕虎豹浮跡陋鷗鷖

壽張希孟父郡侯八十二韻

古渭垂綸老康衢擊壤翁
星輝騰處士天爵賣家公
顛氣西郊肅祥雲北渚濃
坐班鳩杖叟舞轉柘枝童
壽骨英光聳厖眉厚德充
九重恩誕錫三命偃彌躬
麟紱開華旦龜齡擬少蒿
簪花便廣穎植菊瑩方瞳
鼎釜兼珍飫刀圭上藥融
傳宣壺燦爛合宴珮青葱
積慶先猷遠詒謀晚福豐
靈椿培世範玉樹挺家風
正色通天闕高懷納楚宮
倚風看雁北就日見雲東
君父恩彌重文遊論盡同
竭誠心翼翼移孝思忡忡
意壯追奔馬機忘數過鴻
玄參揚子衍書比伏生工
浩蕩漸摩澤昇平塊扎功
定須超混沌何必問崆峒

王叔能侍丞相入見王繼學尙書序其事謹賦十二韻

行殿圍氈邸鑾輿擁翠簾
重華方聖治上宰益勞謙
臺閣推公幹蒿萊擢孝廉

官儀精考核選格絕停淹議禮心如穀探賢手自籤都曹清望重瑣闥雅才兼
對榻褻嘉寵垂紳俯伏瞻傳宣捐酒錫拜命襲衣霑令節薰風細皇恩湛露厭
事殊靈壽杖賜比水精鹽際遇喧朝野矜誇徹里閭遺臣思載筆往恨泣攀髯

清容居士集卷第九

清容居士集卷第十

元 袁 桷 撰

律詩 七言

廉右丞園號爲京城第一名花幾萬本右丞有詩次韻

閉戶春深詩祟侵卷簾新燕掠清陰亭亭梅月能消酒肅肅松風獨和琴新筍未容穿石徑落花時許補雲林主人妙手隨機轉萬本姚黃磨紫金

楔日與剛中待制至廉園閉門不內駐馬久之復次韻

雲鑱亭臺烟霧侵難將楔迹擬山陰花飛竹外疑紅袖水度松間自玉琴駐馬客迴迷遠路倚闌人在隔清林誰言洞口無消息一見應須直萬金

送孫道士歸杭

送雁南飛十五年朔風吹雪上華顛梨花的的疑蝴蝶燕子深深似杜鵑東野先生愁外句西湖處士夢中緣抱琴獨去知無奈一棹春江水拍天

次韻王寅甫侍讀蒞醮長春宮

飄飄笙鶴兩絲輕聽徹靈瑤曲再成玉案香分花有影瑤塔松暝露無聲九枝
燈裏開真景三素雲中賀太平莫怪錦袍衣袖冷還家從此羨長生

蛻骨棱棱似鶴輕觚壇危處玉爲成天街正候三能色雲所疑呼萬歲聲氣篆
通靈歸廓落心章祈歲報清平金穰上瑞吾皇意不用神芝朵朵生

題張宗魯編修詩集

雁蕩峯寒晝飲冰碧雲爲構玉爲棱已除白髮三千丈疑上瑤臺第幾層松頂
露涼旋整鶴原頭火淨撇游鷹何人妙解清新句剔盡風簷一寸燈

送李伯英秀才歸廬陵

黑頭徒步謁神州款款飛塵鬢已秋日暮競傳鸚鵡賦天寒誰解驢裘雁聲
未歇砧聲續燈影初銷月影流可是親知留不得故園清興起滄洲

次韻答周秀才

湛湛玄雲起研山桃花爲色玉爲顏溟鵬水擊三千里天馬風生十二閑芳草
春濃堪試筆長空秋盡獨憑闌松階翠影流如滴遲子攜書共往還

次韻成季灤陽見寄

客思如癡日似年，晚風投幘思悠然。
看山不逐馬蹄去，得句時從雁足傳。
紅綠芰荷秋岸青，黃蒲稗雨田田。
尊罍有興愁無奈，欲問渾河下水船。

次韻陳又新

登臺底用惜春菲，平楚微茫落照時。
燒後斷碑遺鳥跡，耕餘殘壁隱蠶眉。
泉分去路蕭蕭玉，山聳歸雲簇簇旗。
駐馬應須更搔首，遠烟迴雁不勝詩。

西湖空濛圖

舊隱湖山筆底收，相從京洛意中游。
昏昏車馬飛花雨，寂寂鍾魚落葉秋。
千古登臨翻昨夢，百年歌舞漾清愁。
何當化鶴看滄海，不用呼猿汲澗流。

次韻張秋泉盆梅三首

萬里南來帶白雲，低徊猶作自由身。
孤根齧雪疑無伴，冷蘂餐霞別有春。
頗憶西湖頻入夢，不煩東井與生神。
相看歲晚真清絕，疑是瑤臺第一人。

深明閣裏江南樹，老鶴翹翎似病身。
紙屋藏雲團白雪，丹臺朝日補青春。
蒼苔

有恨悲山鬼翠袖無言倚洛神回首空林歸未得淒涼相對獨關人

華頂空餘萬疊雲獨將清影伴吟身虬枝欲挾窗前月驛信能通塞外春底用
施鉛鄰越女從教翦水恣波神碧虛仙客清無奈留作新詩故惱人

次韻仲章游南城二首

瑤閣雲深野馬昏分明日月引天門峯迴九鎖疑無路水過三叉別有村頗怪
鶯花春不負卻嫌雞黍約誰存山童閉戶茶烟暝客至從渠未許論

側身千仞苦不早愛此春從天際浮北雪西山憐我瘦黃塵白日送君游翩翩
目送雲中雁杳杳機忘海上鷗今古登臨總陳迹倚闌何事起清愁

贈王君佐

精神映日碧芙蓉直節昂昂衆不如十載長安心似水一官淮海食無魚少年
已擬治安策晚歲肯爲封禪書聞道功名須皓首鐵冠簪髮莫嫌疎

送蕭立道歸天台

華頂雲寒人不到煩君爲上最高層天雞正叫三更日海鶴曾餐六月冰客路

微茫同脫木鄉情依約近歸僧還家莫作採芝叟背負青天傲大鵬

送李景山使交趾

萬里雲南把一麾日南重見使車馳思家不作玉門表得句擬題銅柱碑象譯
舊傳周禮樂馬人遺俗漢威儀枕榔溪驛疑飛雪樹樹梅花九月時

九日書懷

烏帽衝塵鬢漸皤黃花慵插獨婆娑新霜去雁天機少落日歸雲雨意多拄笏
看山真我事持螯把酒爲君歌登臺欲盡鄉關望一徑松陰長薜蘿

慰曾道士

積構層巔聳玉臺松花浮翠雪皚皚終然一笑騎鯨去可是長眠化蝶來身外
乾坤憐納芥壺中日月隘浮盃何人欲問先天事隱几蒼髯換不迴

抵滄州先簡善之應奉

黃金臺上英賢滿白玉堂中步武新愧我清塵暗顏色羨君碧眼曠精神春風
未信看花少年夜應知視草頻北望五雲開曉霽相思那得勝相親

送李彥謙赴西臺御史

百二山河驄馬游西風渭水思悠悠鶴翻古柏千年雪鷲擊平蕪九月秋拄笏
漢陵尋玉雁解鞍蜀道問金牛官曹朱墨何時了一榻清吟是勝流

張虛靖園庵扁曰歸鶴次韻

招仙游館構亭亭萬疊松寒曉日青玉局講殘春換劫石臺丹在草通靈紅羊
赤馬悲滄海白虎蒼龍儼大庭爲愛子喬笙鶴美月涼時許夜深聽

送華道士降香武當山

神君壽與玉皇同歲歲香傳第一峯龍虎使來紅日擁龜蛇靈在碧苔封萬年
松子天風奏九節蒲根澗水春博士文工成故事石牀爲採玉芙蓉

送虞伯生降香還蜀省墓

玉雪祠官貂帽低笑乘飛燕上天梯寶幡繡重團金粟鈿合香巖印紫泥官饌
每供千歲鹿驛程深聽五更雞流沙可是河源地搖首揚鞭更欲西

承相墳前雙闕摧泉聲隱隱柏崔嵬金牛已向秦中去銅馬空傳渭上來叢竹

兩留銀燭淚落花風颺楮錢灰百年華表塵千劫聞道曾孫始一回

再次韻

振衣千仞笑雲低捫歷星辰履劍梯度坂政須三尺筆入關應笑一丸泥神君
祭重祠青馬墨客才工頌碧雞萬里遨頭端不負花開緩醉玉東西
閣道新年舊石摧望鄉使客意嵬嵬犀牛坐見降王去杜宇聲隨望帝來三卯
錄成魂有燐五丁神泣劫揚灰推醜欲作鄉鄰會揮手先催弩矢回

三次韻

觸石危藤壓路低哀猿送客上丹梯一百八盤雲亦雨二十四番花似泥解佩
浮游憐野馬振衣亭育聽天雞拾遺已去武侯遠空戀祠堂與灑西
時平弔古莫心摧去驛斜陽指馬嵬曲曲松陰隨帽轉層層山影入杯來草玄
有意池留墨觀象無心筋畫灰爲問丈人今在否青牛穿嶺日千回

送王繼學修撰馬伯庸應奉分院上都二首

玉京高處雪流脂連插雞翹綠鬢垂蹠躩有泥歌獨漉琵琶無夢說相思黑河

舊樂催填譜白海名花擬進詞羽獵上林俱罷賦卿雲何以報明時

淺坡平疊積漫漫拂嶺青帘罨畫看氈屋起營羊胛熟土房催頓馬通乾桐官
走驛傳金碗冰正分奩貯玉盤莫上鄉臺望南北白雲微處是槍竿

寄王儀伯太守

維揚太守文章伯故壘荒烟取次題逆浪風高淮白上寒沙雲落海青低極知
后土花如雪不惜平山醉似泥跋馬使君官驛畔揚鞭卻在夕陽西

壽劉承旨

茲審齡開希有文潤太平玉杖造朝樂堯堦之化日銖衣拂石歌舜殿之
薰風壽擁靈椿歡傳故梓敢陳善頌庸贊令辰

稜稜鶴髮暎方瞳玉帶桓圭一品崇禁署清名行世久高門盛德與天通升堂
衣並老萊子傲國詩傳衛武公共道榴花宜結實綠陰濃淡駐杯中

孟習卿都事母八十歸省關中其家四世科第祖十五當金亡時舉進

士終待制

鶴髮初開九九年東西雙鳳集庭前

乃兄官燉煌亦歸壽母

篋藏龍榜金花淡案捧鸞書

鈿軸鮮竹筍清甘宜夕饌萱花芳遠傲春妍風流文物關中舊點檢諸孫射策

編

送李元章宰陝縣

稅冕觚壇匹馬歸冥鴻斜日悟天機明時法律心常鄙小邑弦歌願豈違潁水
初霜黃葉下華山新雨碧雲飛當今人物須公等行見鋒車入帝畿

次韻李伯宗苦熱

庭院無眠夜氣深繁星閃閃漏沈沈祝融煖火翻初劫姑射疑冰易舊心角枕
雲蒸紋欲斷蠟燈烟暖淚難禁蕭騷忽作還家夢翠木扶疎萬竹森

次韻程士安睡鶴

疏翎慵受朔風侵谷口雲歸自在心蝶化不知人事改蟻酣空憶世塵深珠宮
胎息天濤靜寶所神游斗柄沈何事驚烏繞林樹月殘衝曉議晴陰

次韻陳海陰

三月雪花飛作氍春風似欲駐新年夢當好處成烏有歌到狂時近自然村樹
綠齊黃鳥界海山青盡白鷗天何人會得龐公意布領長披不上船

次韻院長退朝書懷兼送李元章廟令三首

踐阼篇陳夙致齋明良慶會叶榮懷南山豹聳文章潤解谷鳳鳴律呂諧黃閣
規模深倚注金鑿人物費推排夜光照坐羣傾動誰道驪龍左耳乖

朝迴深坐碧雲齋無限家林入素懷整頓乾坤新禹貢翦裁冰雪舊齊諧觚稜
望日紅蓮擁蹠躩看山玉筍排魚水政親那棄得白鷗相對莫相乖

曾着蟬冠會宿齋陽春玉雪映澄懷黑頭瑞世須奇遇白眼論交自寡諧腰裏

當塔身獨障

有乘馬入廟門者叱出之

舍桃薦廟手親排蕭蕭匹馬投山縣人事相推似好

乖

題皴齋

蒙蒙眇眇傲滄溟羞殺任公夢未醒寄館蠅鬚猶綺靡深藏黍粒獨清寧掌中
旋舞憐飛燕案上能行笑巨靈惆悵九衢長劍客駢肩堂下慕遺腥

送東平程太守

泰嶽巖巖鄆水清分符投老得安榮百年禮樂維時舉比屋衣冠合旦評馬鬣
舊封蒼檜老龍鱗古殿綠蕪平高唐路近羊生泣東望憑公爲寫情

送周南翁分刺池陽

柳亭松露十分甜秋浦天青雁拂簷黃葉滿庭君吏隱白頭掩卷我郎潛風催
帆影迷紅蓼江送歌聲入畫簾惆悵九華金碧洞謫仙人遠月纖纖

次韻雙頭菊三首

袖舞西風大小垂駢頭容立傲霜姿步搖高擁車同入笑靨初鈿坐共移素質
斷金疑並蒂閒情餐玉喜浮眉蓮池睡冷鴛鴦起似怨秋聲有恨離

碧雲低壓玉繩垂鸞鵠交翔表異姿白帝司秋金已肅黃人捧日馭初移藥宮
罷講扶雙髻桂館霜餘卻十眉剩掃雕摻兒女態象中明兩見黃離

空庭雲盡露珠垂翠羽交分大雅姿氣服中黃心獨苦光浮大白眼爭移智瓊
有約徒誇額京兆多情卻畫眉桃李爭妍真不遜故留雙玉伴支離

閣阜山青玉軒晦庵容齋諸賢觴詠之地虞伯生作記吳成季令賦詩
江南琳館蕭閒地一一新文付集賢真誥總傳天外語禁經未數酒中仙步虛
巖近琅玕響禮斗壇空薜荔緣諸老會文題詠絕□誰鳳觜續離弦

題揭曼碩詩卷

深湛妙思筆鋒收的的冥鴻楚岸秋直以紫芝招綺夏擬將白羽定曹劉松濤
夜漲驚金谷花雨春濃爛錦洲此意徬徨人未識期君翫月上南樓

送衛大隱回錢塘

衛清叔
曾孫

諤諤中丞骨已仙滄洲漁火起寒烟魏公賜宅猶傳笏元子磨厓可賣錢夜雨
鼠鬚編素業春風麈尾話行年西湖雲鎖梅花凍休浪狂歌酌酒船

送華道士住宗陽宮

黑髮祠官佩水蒼萬松深處對虛皇黃柑有法能爲酒紫朮無飢可當糧招鶴
舞虛山月冷檄龍吹雨海天涼瑤池欲問長生事汲澗研朱寫綠章

翦刀草

手截溪流護翠苗層陰淡蕩碧雲嬌秋風玉殿釵留股晴日朱筵舞折腰眉缺

可能分燕尾頂荒猶解插雞翹翻思往歲南方厄羣采空陂恨未銷

鷺此一名
鷗刀一名

燕尾爾雅芍是也
南方饑歲採食

馬伯庸擬李商隱無題次韻四首

金縷歌殘月滿江玉顏曾憶侍油幢象牀雲重恩專壹鯨錦波翻賜疊雙春淺

正宜氈作幕夜涼深恨魴爲窗浣沙可是無靈匹側足寒溪濺石淙

翠簾匝匝護朱光千葉宮桃滿院香閨苑有鸞通尺素靈橋無鵲寄流黃上林

賦罷歸巴蜀興慶詞工謫夜郎不是月中親度曲世人那解聽霓裳

相期心似石城潮日望晴虹結彩橋卻月眉愁歌漸遠凌波步近意非遙抽琴

有恨迴清角疊袖無塵轉綠腰弄玉最憐隨鳳去秋來誰與伴吹簫

白髮詞臣兩耳垂華諛堆笏陋牛醫宮娥引燭催麻日院吏傳更寫制時蠟撚

化生秋夕賜翠標疊勝歲華移低頭欲說唐朝舊願侍虛皇進玉卮

送浦如淵辭官南歸

厭聽朝雞擁被吟吳船水滑碧千尋平洲種橘清霜重小墅栽花綠霧深瞿鵠
真能談孟浪鴟夷端自愛浮湛因君搖蕩還家思燭影秋房恨不禁

送李公敏荊州之官

幼着儒官佩楚蘭文章元不給飢寒風前野馬停盃卻天際冥鴻挂笏看作計
政須千樹栗養生那用九還丹偏州事簡登臨足花下題詩更倚闌

劉婦表門 王中丞妹

空林露下菊無馨玉雪深闈養暮齡河水汎舟雲耿耿湘潭鼓瑟雨冥冥夜燈
孤雁鳴何切古鏡離鸞舞已停晚歲不須多感慨雙楹高亞柳枝青

永新□氏義門

銀髮棱棱鶴骨尊舊傳庭誥付諸孫要同公藝書芸館還擬自倫標楔門春酒
緩歌常棣雅夜燈深候鶴鵠原他年欲向廬陵客詢是瀧岡第幾村

送柳唐佐出守懷孟

甬道塵深曉倦趨河山環抱暫分符花開屬縣詩頻賦竹暗名園酒易酤積雪

翠峯通小有祥雲朱邸接虛無寇恂可是專河內入覲應須馬疾驅

次韻大亨待制賦院中御馬纓花

華林清切謝塵纒坐閱朱英不下堂九就當胸猩血淺六駟飛翻雁行長擎天
力重朝承露向日心專夜斂香清蔭政須容小草肯同羣卉鬪妍芳

賦文子方簣簪亭竹影五首

簣簪亭裏畫天然穠淡疎明筆有玄水底青蘋羞宛轉月中丹桂妬嬋娟錯刀
側布難爲贈鉤鎖橫陳不受填午夜碧窗人獨坐分明清派出丹淵

文與可號
丹淵集

瑣窗午色墨花鎔側側低低隔面濃日暎黃離金瑣碎雲開白賁玉瓏鬆蕭疎
忽印青禽獨旖旎疑分翠羽重二子定知忘食色高齋今喜見遺蹤

霧縠禪衣網翠裳倚風蕭瑟轉琳琅縱橫直欲攻堅白濃淡渾疑榻硬黃劍氣

低昂動天地神光離合幻陰陽陶生久矣知形累歲晚沈冥託贈章

形贈
影

玄覽功深萬化遺一窗光透白差差梳風櫛雨呈千手卻月橫雲鬪十眉形貌
已忘身有累神交應許我相知暗中摸索誰消得阮籍途窮眼未眵

朔吹南塵久避招閉門白醉獨逍遙玉淵龍起鬚騰擲銀箔蠶登繭動搖露井
珠輝湘女淚雲屏翠暈沈郎腰象中直欲窺參伍肯學紛紛个字嬌畫竹家
忘个字

栗氏玩芳亭

納納羣芳入小亭嵐光霧彩思沈冥飛花成列粘棋局高樹參前列畫屏鶴避
晚烟茶半熟鶯啼午日酒初醒春風可是饒紅紫一片蒼痕眼倍青

送牟景陽信州監征二首

風帽霜鞍絳闕邊晚隨陽雁度新年榻前諫笏家猶寶架上經箱客總傳世事
不知蒼狗變機心端與白鷗眠冰天車碾淮南路痛嚼梅花一惘然

上饒山簇水精屏江左諸賢冢樹零鬼谷橋寒松化珀仙巖土暖草通靈丹鉛
有法供烹煮筍蕨無租給使令盡道中年多作惡相看鬢影各星星

送巨德新四川省郎中

金鑾清密簿曹稀拄笏看雲數雁飛蜀省地尊卿月重漢江家近使星歸草堂
舊詠迷陳迹石室殘經臥落暉戰壘已從芳草換未妨晴雨眺摩圍

退食公庭日未西
浣溪清雨換障泥
籌邊舊式傳銅馬
弔古新詩問石犀
荔子綠陰鸚鵡過
杏花紅影秣歸啼
遨頭雅集須頻領
不惜郛筒取次攜

送樂德敬甘肅儒學提舉二首

磅礴坤輿總帝圖
手提文印化沮渠
旋宮更問涼州譜
尙右時通梵國書
枸杞夜號端入驛
蒲萄秋落易盈車
飛沙斜日頻回首
歸雁相迎亦惘如
月支城下泉如酒
祁連山前雪似沙
虎頭萬里飛驛埃
蜨夢五更驚塞笳
范老籌邊心磊嵬
李王堅壁骨槎牙
白頭太史欲歸去
時立東城數暮鴉

示從子瑛

聞子欲通靈寶祕
天台洞客眼深青
弄丸底問月消丙
服食那能老復丁
隔竹引龜心有想
按圖索驥術難靈
吾衰端有先天易
不用山中採茯苓

送玉笥山聶道士

五月凌風龜殼船
梁山深灤白鷗鮮
神清似飲金莖露
病已何須玉井蓮
墨閣小春刊畫錄
碧窗新月補瓊篇
相親每憶相忘處
北望歸鴻倍惘然

人日立春子昂承旨賦詩次韻

鳳曆調元二節并泥牛華勝得相迎翦花欲擬丹心巧縷菜深憐白髮生日轉扶桑瀛海曙陽迴析木歲華明登高可是無芳思歸雁南來倍客情

帝京節物喜相并挾日晴暄淑景迎鳳輦雲開人共仰烏輪海轉子初生

是夜友正

立春明日甲子岸容梅柳風光動澤腹魚龍水氣明誰惜玉堂春晝永汗青無補若為

情

書懷寄從子瑛二首

越公舊築鄞江宅風捲飛花劫火新子竟尋真餐白石我方作史玩青春金張螭綬本欺世王謝烏衣亦可人誓墓政須堅晚歲雙峯擁髻碧嶙峋

當年羣從玉參差炙轂談天不數奇翦葉舞空山鬼泣唱籌量日曆人疑深春柳下爭飛騎小雨花前鬪弈棋我最少年唯閉戶篝燈煮藥學題詩

送李仲因雲南憲使

鋒車春倚少城邊上冢還家思惘然就日雲低天尺五圖南路近里三千相如

作使文如綺諸葛籌邊筆似椽自是蓬壺舊仙客望瀛新曲雁飛傳

送馮士啓淮東憲司幕長

遠涉江湖奉板輿離亭柳色易枝梧英標共擬崑山玉符采堪鄰璧社珠土竈
煙高溼黃葦沙溝水淺漲青蒲煩君敏手須期月天際回朝認烏鳧

送李仁父歸高安

枝藤雙屐玩青春廿載登臨筆有神東海競傳垂釣客南山曾恥上書人解凌
水滑千帆直禁火烟消萬柳新從此閉門聞見絕高齋顏樂養天真

送王繼學御史分司汴省

松階並對影參差君竟乘驄佐聖時每恨同情不同調可堪相送復相思楚山
春夢行雲識汴水秋聲落葉知我老江湖盍歸去少留定刷錦囊詩

院長有子在外從許州募得之院中率賦詩

袞繡門楣五色新明珠還浦竟相親月中顧兔分傳的天上麒麟抱送真仙李
蟠根元指姓露桃食實始知春青箱萬卷能傳業佇看它年演世綸

題東平張善父野堂

秦嶽當軒積翠環野堂高築稱身閒
深春藤榭花溪醉小雨芒鞋藥市還
九老尋盟歌窈窕諸孫勸壽舞斑斕
客來欲說人間事松滿疎簾月滿關

贈姑蘇陳生

絲東昌遇大水買舟
渡避水者二千得官

清秋水落渺無津
河伯登林竈有鱗
用力定知非一日
論功何止活千人
放龜晚歲川如掌
渡蟻當年筆有神
堪笑乘輿溱洧者
孤舟空艤竟摧輪

送鄭景尹游麗水

冰雪長身暎漆瞳
峇嶢深處珮青葱
碧窗讀易猿啼樹
石洞題詩鶴舞空
強項政須消世慮
折腰元不爲身窮
玉堂倚馬須英俊
佇看鵬程振祖風

次韻院長新製安車

禁路縈迂雪護沙
老來丞相許乘車
向推紅日頭如葆
今看青天眼未花
馬識輪聲嘶外廢
鶴追轍迹過仙家
似聞相杵新堤曲
歷錄催朝扈翠華

送張道士降香龍虎山

天香歲歲下名山雪浦春融作使還鶴引老樵渾碧眼燕迎舊主的朱顏雲浮
玉佩身疑舉霧結層樓手可攀暇日須回侍郎宅好題修竹聽潺潺

饒州張待制之族孫

寄貫酸齋侍讀

解珮瀟湘已廣騷因風更望子胥濤身輕舊食青精飯思遠新貽金錯刀紅蓼
秋清堪數雁黃橙霜熟且持螯龜趺林立巖題品得意那無一字褒

次韻蓬萊暢師

西山秋冷雪皚皚駐馬頻聽出塞歌短艇水生歸雁急故園春盡落花多登山
見月雲光淡坐石臨溪樹影峨海上故人機事息詩來勸我老漁蓑

次韻天童岫禪師

太白峯高積翠明老禪的的寄深情相思沙磔唯懷瑾獨立鄉臺近子卿舊業
久荒松露立浮名空眩槿朝榮定須結社修真隱寒月深燈了梵經

吳門頽上人年甚少訪余田舍且惠詩次韻

草舍苔深徑已荒何人着履試初霜飲冰喝石精神聳煢茗跑泉齒頰香愧我

歲窮驚浪走愛君年盛鄙清狂古松流水平生願後會蒲團共燭光

冀寧徐母表閨

月落孤幃霜滿墀篝燈深護祿中兒肯爲別鵠相思操得見慈烏返哺詞槐柳
拂雲森宅里芝蘭擁砌映門楣高堂訂坐雙眸炯時說初年涕洟頤

清容居士集卷第十

清容居士集卷第十一

元 袁 桷 撰

律詩 七言

過揚州憶昔六首

令威化鶴千年返，列子御風旬日游。已信銷沈同此意，莫將寂歷起清愁。江流今古空陳迹，山色有無知幾秋。赫赫當年成底事，斜陽明滅隱滄洲。

漢東之國古隨州，一老昂藏死卽休。黑髮虎頭真骨相，青春麈尾鬪風流。人言謝傅爲朝鎮，誰信鍾儀作楚囚。浩蕩乾坤納今古，好將汗簡寫千秋。

空遺蒸壤白如銀，不見當年指畫因。高視漢庭無出右，清談洛學竟成真。極知羽扇爲癡具，更恨烏衣是偶人。六合車書端有意，百年荆棘已生春。

蕭蕭凍雨濕旌旄，猶著殷紅舊戰袍。金盃昔聞歸馬埒，牙牌誰肯信龍韜。樓頭換箭鼓聲急，堂上傳盃歌韻高。到底姦雄有真態，木綿庵畔鬼車號。

連檣米艦接江湄，鞭撻東南力已疲。虛籍漸成藩鎮侈，辟書時被廟堂移。清風

號野黃蘆淨亂兩傳更畫角悲從此甲兵端不用書生有味老清時

四城賦擬張衡麗十鑑書同賈誼哀

公有四城賦江東十鑑

腹裏春秋納雲夢案頭今古

起風雷青衫不受折腰辱

舊尉慈溪為郡守厲文翁劾去

白眼豈知徒步回

乙亥間道歸里

舟泊城南

更回首寒風吹淚下天台

此詩屬胡懷寧三省

觀物

黃河不信從天下濟水那知有伏流自古乾坤合神化空將簡牘費冥搜張華博物身終死鄒衍談天舌竟休我亦從今銷綺語春風碧眼玩沙鷗

客中端午簡善之

海城紅憶石榴新海子空看芍藥春節物似憐游宦客風埃終媿醒吟人已無蒲酒澆清恨那用蘭湯浣素塵健羨南坊鄧供奉團欒圍坐笑歌頻

再次韻

尚憶山城節序新榴花疑是十分春田園處處祠蠶祖

浙間以端午祠蠶定絲價

門戶家家

插艾人可怪詩書成白眼卻從車馬識紅塵思家那似攜家樂尊酒招邀莫厭

頻

次韻酬王參議

槐陰散髮亭亭午花影持盃拍拍春佳節擬酬懷古意清風不礙笑雲人光陰
滿眼消黃爛世事忘言煮綠塵相望江湖知已久相親杖屨莫嫌頻

玉堂合歡花初開鄭潛昭率同院賦詩次韻

一樹高花冠玉堂知時舒卷欲雲翔馬嘶不動游纓聳雉尾初開翠扇張舊渴

未須餐玉屑嘉名端合記青裳雲窗霧冷文書靜留取餘清散遠香

崔豹古今注青裳一

名合歡今但名合歡而青裳之名不著

笑壓春菲綠滿堂翩翩清暑獨高翔錦雞朝日輕霞吐彩鳳舒雲密翠張中散
舍傍銷綠綺婕妤扇底泣黃裳芭蕉可是無情思一展隨風不解香
風流一老笑烘堂解佩看花欲共翔夜露未晞歸翼斂朝陽初旭怒髯張霧窗
不用青綾被天闕誰縫綠縹裳朱槿黃葵效開斂爭妍那得有清香

次韻鄭應奉苦雨

漏天有術那能補息壤無功不願豐漠漠雲陰來委羽昏昏水氣接垂虹

吳門水菑

尤甚車塵已逐油泥黑龍火渾疑野燒紅萬里乘除同此意相看咄咄且書空

觀閒齋紅梅次蘇公姿字韻四首

莫恨飛瓊花信遲相看冰雪已芳時
藥珠霞補春風面萼綠雲開旭日姿
骨相未須嫌火色精神真欲傲冰肌
何人瀟灑紅綾裏巧暈輕煤畫折枝

臘底飛翼瑞已遲天將絳雪報清時
施朱可是良工手補袞端歸大雅姿
溜溜溫泉傳賜浴斑斑辱井愧淪肌
閉門已覺寒如許迴首江南竹外枝

雲閣香溫睡覺遲不堪殘角曉鐘時
玉妃瓊屑難爲從青女鉛華敢弄姿
可怪鮫綃能幻色誰將猩血解填肌
團團似就迴文錦薄暮凝愁下翠枝

筆底冰清落句遲花神已報豔陽時
疎明不作顛狂夢嫵媚猶存諫諍姿
酒力衝寒端著臉枕痕破曉欲侵肌
道人不愛人間色乞取初開第一枝

壽善之

二月柳青春滿枝十分蕉葉不須辭
黑頭政謝赤松子碧眼故憐黃口兒
玉井

蟾蜍吞暗浪錦袍蛟蝶舞游絲雲窗松暝文書靜蚤晚行修野外儀

次韻仲章游長春

積翠中天下土昏坡陁深處轉金門松間不遇采芝客雲裏空憐打麥村華表
鶴歸城已換滄洲人去柳空存高堂靈骨疑金鑲應許重游得細論
入極端能合寸眸丹梯危盡覺身浮手持玉笛誰爲贈背負青天我獨游山影
西來疑駐馬雲光南去似輕鷗人間底用重迴首樂極無愁果有愁

次韻仲章舟中思南湖

綠陰濃處彩毫揮忽憶春殘理棹歸約略晚花圍錦幄招邀稚筍試斑衣長年
客影如雲度五月湖光似雪飛從此清林供笑傲莫看迴雁損天機

再次韻

到手清觴不用揮滿川帆影逐風歸花前自憶堂前竹道上重看身上衣虛牝
鳴秋通澗急伏雌驚曉隔林飛還家絕勝從游樂只恐雲窗趣斷機

倦客慵將塵尾揮倚篷日日聽催歸澄波自映烏紗帽小雨深憐白紵衣花徑

春殘人獨立松林雲冷鶴孤飛相思此地今如許萬里重迴且息機

次韻仲章過彭城

山影涵青簇簇來周遭城角漸低回梁分曲直雙龍下水合縱橫萬馬迴鑄冶已銷游子俠登樓誰負謫仙才淒涼正字寒如許萬疊蒼雲鎖翠苔

仲章詩律大進數日道中論詩亦頗相合復次前韻以勉之

氣摩屈賈欲平揮格律論詩要有歸石髓定成千歲乳藕絲空綴五銖衣寒原草盡蒼鷹攫涼月松陰白鶴飛從此窮河天已近還家何用詫支機

仲章詩律已入唐人風調而下語猶未馴妥殆類禪人過橋斷橋之意

近世學者類有此失仲章德業遠大當不若是此殆其弄翰也次韻

落落懸河巧發揮盤渦洄洑竟東歸苦心欲寄千年簡妙語誰傳半夜衣野馬功名甘卻走雕蟲翰墨愧橫飛多言要是平生累瞪目相忘杜德機

玉色橫陳羽扇揮江湖邂逅似忘歸終憐古調難爲瑟誰信天香不染衣汀草弄妍成背怨山雞照影惜分飛鮫人兩夜珠成滴清曉知裁第幾機

平生俗客手曾揮愛子清新欲倦歸北闕正鳴蒼玉佩南湖空製芰荷衣麒麟
瑞世非關走鵬鷲呈空不爲飛薄宦政須成吏隱莫將奔逐墮危機

舟行將次淮南行復敘別而仲章歸程可還家作端午次韻述情

曾憶登舟送客揮艱難何事獨南歸楚鄉水暖沈菰黍江國雲深潤葛衣坡筍
綠迎馴鹿過海榴紅駐小鶯飛笑顏已極誰爲語絕倒無嫌似陸機

中秋次韻貴白

桂子香飄露濕巾廣寒疑使月爲賓流螢不受十分采過鴈真成一點塵吹徹
梅花天外思飲殘竹葉夢中身靈河自有乘槎便擬轉神山閱爛銀

寄王參議

朝川新樹綠勻勻睡起慵軒岸葛巾穿石養魚迴小隱盈缸釀秫補長春胸藏
醫國三年艾天與傳家一角麟蒼狗白雲今已定不應談笑卷經綸

玉堂文杏合歡枝共說仙翁賦有詩日暮團團空翡翠雨寒點點自燕脂塗鴉
舊詔追遺事揮塵清談補雅詞千古襟期誰與共相親那得勝相思

泊支家口望瓠山僅一舍復寄

天平水闊鴈參差下有高人坐不移懸榻定知延孺子汎舟無奈似徽之晴雲
滿塢開新畫落月穿梁想令姿眼底憐才誰復近裏糧端擬話心期

次韻應德茂寒食見懷

寒食光陰君莫游亂花羞別古枝頭山家蠶浴雨穿屋海步魚腥浪蹴舟楊柳
飛時疑是老杜鶻啼處不緣愁詩來未盡相思意刁斗寒清月過樓

次韻史猷父春游夜歸

留取餘春伴白頭落花如雪翠如流提壺不用頻沽酒垂柳偏能獨繫舟過雨
月開雲母障隔湖燈映水晶球還家已覺衣裳冷遙聽鐘聲是竹洲

戲贈黃仲正

好花不受丹青鑄碧眼難將白黑分萬里宛駒出龍種十年野鶴異雞羣知卿
未盡才難數酌我毋多酒易醺午夜池塘有新夢好將色筆寫春雲

再用韻答仲正

愛子十年燈火勤，相看不惜錦機分。
飛花映水空憐色，去鴈出雲終念羣。
一寸春霏生遠思，五更清夢了殘醺。
詩來陡覺秋濤衰，海嶼青飛片片雲。

泊彭城復懷黃樓

黃樓高下復誰識，白塔短長應得知。
萬里風煙歸傑作，百年雨露起深思。
文章自昔爲時忌，翰墨于今作世師。
從此江湖掩篷去，碧雲斜日數游絲。

泗水

泗水青於古蔚藍，因依碧藻淨相涵。
遊魚細數心空羨，活火新烹舌自甘。
可怪然犀望牛渚，底煩斬虎觸蛟潭。
清湍混混歸滄海，不惜臨流漉舊衫。

歌風臺

長安菹醢恣猖狂，頭白翻思守四方。
不悟宮中有呂氏，卻憂身後有吳王。
老翁後嗣真癡弱，遊子故鄉空慨慷。
千古英雄多此意，荒臺清淺水微茫。

清明

水落渾黃風晦冥，不知節物是清明。
道旁新塚悲歡盡，柳下長亭聚散輕。
門靜

鞦韆歸燕逐沙寒
冬簷過魚驚河南
禁酒河陽飲醉醒
相看總有情

宜遠樓

紫翠光中擁翠鬟
分明倒影落西山
遊塵自逐鐘聲去
過雨能將月色還
萬里關河新勝概
一天星斗舊躋攀
絕憐想像空題詠
後會應須共倚闌

李學士畫壁初成席上分韻得毫字

春樹纖穠隱碧桃
秋山磊落湧銀濤
天邊雨露歸青障
物外煙霞入素毫
有客支筇臨水徑
何人解珮憶蘭皋
滄洲景物供題品
準擬淋漓奪錦袍

次韻危公遠道士

驪塘族孫與子爲年家

筆勢翩翩千丈坡
一天清遠佩飛霞
金莖欲採珠宮露
鐵箭能敲玉壁砂
人物滄洲憐我輩
冰霜喬木擅君家
百年此意知誰會
相視無言眼倍花
閉門積雪擁平坡
誰把餘醺散綺霞
掛瀑解裁天外練
熬波竟化海中砂
機心著物那成語
句眼論詩合到家
從此相親勝相望
不妨渴墨醉成花

再次韻

家世清聲起諫坡江湖邂逅忽披霞新姿正似三眠柳妙語能爲九轉砂杯寫
黃封來禁道窗留白醉近仙家慙歎懸榻何時下準擬寒空詠雪花
朱顏冰雪暎瑤坡清曉朝陽漱碧霞神目豈堪容玉屑聖胎端可化金砂碧桃
有實誰爲種玄鶴無心莫問家可怪春風滿詞筆硯池頻與滌冰花

游城南次韻陳玉峯

市橋水斷綠交加簇騎隄尋處士家坐聽蟲聲行木葉臥看雲影落簷花清晨
采露筠籠重蘊暮沽春烏帽斜一徑寒英端手種好烹晴綠代煎茶

送真定任生

束髮從戎天外萍還家何事說飄零花前秉燭頭疑黑馬上看書眼倍青倚劍
獨憐今古月吹笳時憶短長亭故人烏府頻相問一笑惟尋雙玉瓶

次韻史允叟殘菊

白鴈西風幾夕陽故園牢落是宅鄉獨憐壽客三秋晚不受玄神一夜霜曉沐
緩垂蒼玉珮晚粧愁帶紫羅囊凝香深院誰消得時許飛瓊點額黃

次韻元復初簡危公遠

客舍光陰幾驛亭天邊白日轉重溟擬將竹葉留春住共慰杏花隨雨零鶯入
上林貪翠萼鶴旋華頂傲青冥十年道舊元文學爲笑無心似水萍

蔡逢原編脩婦翁壽八十

堂堂經學古儒風三世相傳八十翁靈壽杖扶雲兩屐延年水飲月雙瞳閒逢
好客猶花下倦憶前朝似夢中閭社從今誇盛集重行彩袖舞杯空

次韻陳無我題石窗故居

煙雨歸來別有春支頤曾作笑雲人還家未信三千里拂石今看第幾塵往事
黃梁方就枕多情白髮竟沾巾故園未覺秋容淡留取孤香次第新

夜別俞生

半秋歸夢常繚繞三十六雷煙樹重

所居山名台人謂山高處爲雷

欲別祇看今夜月無眠更

聽五更鍾青帘出市橋邊路白雁連天海上峯聞道還家有新樂不妨雲榻臥

高春

次韻正旦會朝

闔闔春迴旭日鮮，花光搖曳珮僊僊。
金蓮漏下催初刻，玉筍班齊祝萬年。
香擁袞龍開黼坐，風迴笙鶴舞鈞天。
朝元法曲誰傳得，歸醉蓬萊話日邊。

送山人還江南

白雁南來愛朔風，掉頭我亦一枝筇。
澄江去浪疑奔馬，古洞歸雲似伏龍。
釣石水移黃葉滿，丹爐煙冷碧苔封。
從今不說人間事，更上峇峽第幾重。

次韻田師孟詠牡丹

積翠瑤京玉作層，笑餐承露議誰勝。
腰寬似稱黃金重，心巧終憐刻楮能。
蜀客錦機流水浣，茅仙丹鼎彩雲騰。
道人香色都忘卻，月落空闌始一凭。

交枝風動碧層層，揮手芳塵謝不勝。
解帶暮雲真韻勝，斂襟午日是驕能。
取青媿白憐雕鏤，抱紫迴黃合變騰。
宮錦競傳新拾得，沈香亭檻喚誰凭。

紫府淵淵十二層，濃春如酒力初勝。
苦心似怨鮫綃薄，敏手難誇羯鼓能。
兩立無言慚委靡，地行何術可超騰。
雲窗烏几誰消得，時許飛瓊月下凭。

次韻師孟西曹卽事兼簡子貞儀曹二首

時議定
律令

盛世昭明復古初，掃除弊事獨溫舒。
牛毛置令心徒褊，鳥跡遺文體本疎。
齊相避堂憐獄市，鄭人鑄鼎泣刑書。
畫簾一度薰風曲，欲寫琴心愧不如。
蕭疎門巷落花初，楊柳陰中指望舒。
辨拙莫窮三耳妄，塵深坐見二毛疎。
覆蕉得鹿非真夢，點筆成蠅豈誤書。
慷慨聽君人物論，雕蟲我亦陋相如。

次韻贈峨眉侯道士築宮江陵

白苧藤冠自在身，獨看潭影認清真。
還丹已化千年雪，玩易重尋太古春。
楚觀江流通白帝，蜀山雲氣接青神。
冥鴻南北疑無跡，萬里乘風問世人。

次韻陳貴白中秋見懷

玉人海上振衣來，一曲清商鐵笛裁。
碎露晶熒疑水立，橫雲缺落似山頽。
卯君端有鎔銀術，西帝慚無斫桂才。
往歲相思江北路，夜闌曾上望鄉臺。

次韻鄭景尹詠梅十首

笑壓羣芳雪霽吟，點粧詞筆補春林。
衝風曳白疑含笑，映日抽黃轉苦心。
鐵石

橫陳羣羽避冰霜獨立二毛深阿戎故是調羹種可爲閒情淚滿襟
醉倚孤根散髮吟他年鼎鼎出園林黃鬚雅相非凡種白面清談豈素心湖月
歌殘銀燭冷湘雲弄罷玉龍深疎明可是無春思角曉霜清整翠襟

幽人爲愛水邊吟雪滿疎籬月滿林魂冷不知莊叟化神清難撓楚王心寒蜂
戀蜜須猶綴霜蠟含漿色轉深千古湘纍詎無意廣騷從此酌靈襟

手題色筆朗飛吟雲佩衝寒入寶林雅操獨高淹海角微陽初動識天心鏤冰
嘗巧機猶淺切玉疑神用始深回首羣芳半麤俗倚風三嗅爲開襟

回首白頭悲故吟清愁萬疊起雲林東君密注非無意北客相逢訝有心絳闕
雲低珠蘂迸碧潭風定玉徽深色香要是人間世更上凌虛始散襟

萬里相逢得放吟醉揩雙目傲瓊林龍沙慘澹明妃怨漁笛淒清處士心餐玉
似嫌玄甫冷笑雲應喜翠微深何人更作江南句翻使兒曹競挽襟

欲看南雪倚簷吟點檢春風第一林天與陽和誰借力晚持精白轉虛心冰蠶
半蛻眉猶溼凍蠟初銷淚漸深夜半花神應有語覆觴從此斷祥襟

梳風帶雨爲渠吟揮手唐昌陋鶴林壯髮初生齊映額童顏已就靜齋心野蠶成繭輪囷富玉兔抽毫刻畫深莫遣風姨強攘袂故教月姊與聯襟

十分深酌十分吟烏帽枝筇故繞林月下無言疑背面水邊獨立似傷心珠成蠟鳳王郎巧笙徹青鸞帝子深歲晚自知誰與伴風篁搖影互交襟

參殘霜急尙孤吟恍恍神游古躡林四皓局殘惟一色三郎鼓罷了無心珠游鐵網青琅潤苔補虬枝壞衲深擬把鸞膠固青蒂未須殘雪墮衣襟

贈潘山人

夢中得前二句因續之

布襪青鞋今已矣看山舊眼碧深深空憐石馬駐荒塚不見金魚飛翠岑地鏡有書穿石乳土圭何術候天心行年七十足稱老牛臥前坡爲指尋

次韻景尹醅醢二首

光陰風雨短長亭花到春餘倍有情翠蔓倚松超直幹錦江綠酒錫嘉名蛻蛟纏影青雲聳么鳳啼芳新雨輕白面郎君休翦綵好將椽筆賦西京

不將名字博西涼留取餘春在一觴當展珠衣迎面立曲房寶曆捧心裝碧雲

一色行明月翠幄千層護夕陽揮手朱殿空爛漫敢將清思寄幽凰

可久齋二首

虛室心源百尺澄深深龜息養空清一川鷗鷺古儀表四海弟兄真性情璧玉
誰人傳至樸鏞鍾何處問希聲芒鞋直訪苕溪上雪透梅枝鬪月明
三十六宮春不老何人月窟重推陳亭亭倚蓋浮空碧匝匝空輪颺素塵郢客
詞工端自苦海翁機息可相親支頤擬問庖犧易笑指靈著似有神

送長洲江都史

官曹無事日提壺一榻深明晝倚梧稻蟹水低歌拍拍蓴鱸秋冷夢蘧蘧長年
簿領慚錐子晚歲生涯羨木奴千里布帆歸思好雁聲伊軋起菰蒲

昌上人游京師欲言禪林弊事甫入國門若使之去者昌余里人幼歲
留吳東郡遺老及穎秀自異者多處其地以余所識聞若承天了天平
恩穹隆林開元茂皆可依止遂各一詩以問訊虎丘永從游尤久聞其
謝世末爲一章以悼

人說江湖少舊僧懸崖深掛一枝藤採苓欲取千年魄擊石曾烹六月冰天上
星辰端歷歷胸中樓閣自層層相逢上說前朝事知是松源第四燈

青鞋高掛天平壁指點雲門三兩峯禪榻已容黃葉覆詩瓢從把碧苔封曉風
殘月千村櫓細雨疎煙隔水春我向京城疑老盡吳山清淺越山濃

獨木山寮不出門一瓶一鉢送朝昏巖迷鳥跡千崖泣松乳龍吟萬壑奔掩息
端如雞抱子愛閒屢見竹生孫海門月落寒潮急準擬乘槎與共論

玉几峯頭第一枝老禪吃吃我深知曾將鐵杵敲冰骨似怪鉛刀割密脾法外
無心猶涉解句中有眼卽成疑袈裟不展蒲團穩此是開元妙總持

我識虎丘三十年精神霄漢鶻張拳機當危處卽燒印語到盡時難續絃路涉
兩岐空有泣溪流一滴竟無傳雙峯古樹蒼藤冒時有子規啼徹天

手調千歲廣寒藥擬補月輪蟾已飛眼見昔人歸逝水心憐志士惜殘暉孤花
苦別生香樹急雪深憐壞色衣爲愛同鄉復同客絕慚同調不同歸

山人歸去意何如八尺方牀自卷舒側岸採茶敲石火隔峯翦竹溜清渠碧潭

印月菱花鏡白雁橫空貝葉書後日相尋定何處不於吳下卽康廬

次韻王繼學

蕭蕭寒雀下庭除一榻蘧蔭是我居雪後看山雙眼淨風前攬鏡二毛疎退之

掌制慚存藁

退之四十八歲知制誥一年僅存崔羣戶部一制余年相同亦草一制

伯玉知非定止車深愧年華

增老大還家早注故山書

除夜雪

黃雲黯淡夜如何晚勢參差更馭娑著地不隨人跡亂舞空偏入麥苗多雅驚
列炬穿珠樹馬趁初朝映玉珂歲律詎隨人事改故將嚴冷轉陽和

元日朝迴

積素棱層厚載坤天雞三唱日初暎千官山立歸文石六衛嵩呼徹禁門花帽
舞風喧法曲椒觴承露湛皇恩新年欲奉瑤池對願借扶搖與化鯤
萬國梯航滿禁衢卉裳象譯語音殊鳳簫聲送纖腰舞雉扇行分兩翼趨花氣
欲浮金鑿落雲光疑下錦流蘇詞臣不識金泥祕指點薇垣頌六符

偶述末章答繼學

承明三入並時流俯仰深慚此地游誰謂東南無美箭極知西北有高樓韋編舊學陰陽祕汗簡功深歲月修三史如山詩思少那能走馬過長楸

金鑿深處是家氈玉雪青春不負賢會見鳳毛能掌制定知麟角可膠弦浮榮芻狗寧居後曲學雕蟲敢避先慚愧南州徐孺子每看塵榻屢潸然

雪後

畫角初消已弄晴曉看突兀眼偏明寒窗駐景成虛白凍樹裁春點素瓊北戶埋藏疑有跡南枝搖曳若爲情憑君欲問飛雲巧水自白雲山自橫

送李署丞歸許下

春風得意故還鄉月白霜清傍曉裝燕領定承新鳳詔馬蹄猶戀舊鷄行溪邊父老欣相遇燈下兒童訝已長我亦辭家經一載青天歸雁攪離腸

清容居士集卷第十二

元 袁 桷 撰

律詩 七言

送喻道士歸蜀

舊與內相李公爲布衣交

鶴骨輕輕碧眼鮮
五千言裏契重玄
定知德裕曾傳道
久與長源共學仙
金籙夜調丹井汞
紫衣春染御爐煙
掉頭不說人間事
指點白雲尋醉眠

趙郡睦孝子真逸堂

青松手植已成雲
盡日庵廬不出門
屋角慈烏議晴雨
階前馴鹿候晨昏
清秋釀黍脩鄉約
深夜篝燈課魯論
明世詎堪成隱癖
舉頭束帛起丘園

五老堂

鬢眉雪色古儀容
五老雍雍氣象同
菊水定知延上壽
桃源今解識高風
弟兄黃卷傳儒素
娣姒青燈教女紅
慣說前朝征戰事
醉拖筇竹數歸鴻

送河中段惟德應奉除西臺御史

千年青簡正紛如還著鐵冠歸故居妙筆醉欺紅芍藥丰姿鮮映玉芙蓉過家
上塚爭驚喜拄笏看山任卷舒試上樂遊原上望綠陰芳草正扶疎

韓參議家慶圖叔祖暨父各九十

丹泉為醴菊為菹的的厖眉似畫圖萬石齒高勤澣洗二疏年並得歡娛兵前
父老難尋伴眼底孫曾總業儒欲向碧桃花下醉斑衣紫綬兩相扶

吳成季父母壽八十

延陵季子古高賢雲耳于今壽種傳有道定知真有子齊眉更喜復齊年蒼龍
雙擁宮醪湛白鶴重歸丹井鮮自是君家多孝感玉杯甘露會羣仙吳猛事父母至孝後

有玉杯甘露之感

白雲平章致仕

曉看明鏡欲休休萬里功名陋虎頭絳闕直辭黃鼎貴白雲終伴赤松游侍臣
傳醴真殊遇退傅揮金得自由盛代東封催告禮更須元老侍垂旒

寄題成都李御史萬竹亭

亭亭萬竹封侯貴聞說西州植此人風送笙竽聯雅奏月留鸞鵠寫清真山頭
密護千年雪地脈潛行八月春舊譜言竹鞭
八月西行欲上岷峨探游事煩君指點浣花

津

送鄧君用教授歸廣信山

光陰那俟日懸車拋卻荷衣即故吾置對直如朱伯厚退休還似邵堯夫白鷗
遠水清秋鏡紅葉前峯落照圖耆舊即今同逝水早將鴻筆為傳模以謝疊山
黨下獄

壽李承旨二首

兩曜迎陽合璧時卯君乘瑞佐昌期閣中像有功臣贊圯上書為帝者師碧眼
閑人如水鑑丹心許國有天知歲周甲子今重轉消息梅花第一枝
清時得意恣逍遙雪色鬚眉兩鬢饒棋局春風深閉戶酒樽涼月獨吹簫豹韜
袖手終傳采鳩杖無心強造朝門外種松今百尺宅年為我掛山瓢

安西老人

方瞳如漆耳輪高喜見曾孫守碧桃鳩杖月明尋枸杞鳳簫春暖醉蒲萄故人

天上方蟬冕老子山中但豹韜欲問汝南蒼舊事且乘龜殼把雙螯

早朝興聖宮次韻

萬馬東西甬路斜銀河初曙起宮鴉天香隨輦凝三素風絮沾袍點六花銅史
漏浮催卓午玉奴聲轉進流霞詞臣點綴瑤池事底用秋風海上查

次韻周南翁退朝三首

蹕道聲迴觀后皇霞旌雙引拂朱光龜臺新按霓裳曲獸鼎重然甲煎香歌板
遏雲穿泱漭酒車流水度汪洋重輪瑞世思齊聖傳信應須屬子長

雉尾高張擁玉皇彤庭金榜粲明光舞階飛絮傳滕六執衛傳臚轉阿香珠帽
簫聲雙窈窕翠旌雲影互方洋侍臣誰近前螭立願紀堯年化日長

蛾眉斑立肅皇皇恰匝松陰陋午光舞翻當軒初進酒表函登陛促傳香六龍
捧御雲中日三象輪琛嶺外洋欲識兩宮清淨理薰風殿閣漏初長

和游岡子原韻

棠花淡淡柳花濃岡子原頭立晚風三月雨聲人共喜一樽春色我難同麒麟

臥草青山外，驟裏穿雲綠。樹中晚歲滄江情，不盡想看清淺數鳧翁。

用早朝韻酬伯生試院見懷

玉署松深月半斜，研朱和露勘塗鴉。射熊心苦穿楊葉，吐鳳聲清飽竹花。過眼似迷三里霧，騰身誰上九層霞。故人掉首南山去，應釣秋風漢水槎。

酬周南翁子二首

小榻燈殘雁影斜，詩成重點墨如鴉。臯禽警露呈三疊，天馬追風翦五花。郢客有才歌白雪，湘纍無計佩飛霞。璿源自是天邊路，不用贏糧學泛槎。碧箋長短鬪車斜，玉雪青春髻似鴉。博物已知窮海棗，苦心端欲鏤冰花。山中伐木鳴搏黍，馬上看塵起落霞。健羨雲窗無限好，慈烏雅雅鵲槎槎。

送儒醫何大方歸信州

雙櫓鵝鳴野水高，天風落葉響林臯。空堂桂露流金乳，舊鼎鉛霜長玉膏。丹府久虛存夜氣，上池新飲察秋毫。山中猿鶴驚相問，肯爲緇塵染素袍。

次韻周南翁拜孔林二首

陵廟陰森佳氣蟠湯湯洙泗接淵源硯傳昔日王官得履憶當年漢庫存手板

文裁楷舊植髮冠香守檜殘根唐文皇以孔林楷木裁手板賜十八學士鄉中張參政家猶存金亡檜焚士大夫斷檜根為韜

髮冠羣經日月行天地萬古韋紳沐聖恩

山簇平林野水清整冠下馬得徐行壇空尚憶風雩樂宅近惟聞金石聲環珮

齊趨文有度豆籩初秩禮為程百年雨露同車軌郡國千官奠帛生

贈豫章蔡黻歸里以鄉舉不中來京師

抵掌彈冠謝未能立談白璧且擔簦厭聽長衢三尺雨愁飲深冬半片冰冠蓋

情傾年運往簡編心苦歲華增去來聞見冥鴻迹岸幘雲峯撫大鵬

次韻院長題趙崇德脩撰玉簪集

誦君家世倚樓句不似玉簪留詠深鳳髓獨傳天外寶裏蹄端出水中金停盃

蘸甲難陪和對鏡搔頭敢擬尋可是因花攪情思相君題品的知音

送朱本初住玉隆萬壽宮

聲華文采動公卿忽縮烏條出帝城眯目簿書空汗漫飛空樓閣正崢嶸浮雲

變態西山盡往事灰心北斗驚肯作蕉池談笑住瑤壇笙鶴夜深清

寄城南友人

三入承明願已酬蓬瀛又復接清流碧牋時寫飛花恨寶瑟曾傳細雨愁夢繞
故園追過雁眼穿鄉樹認歸舟荼蘼落盡啼鶻急慚愧羣公得縱游

寄史允叟

故國王孫佩碧蘭春雲涼月倚朱欄玉簫曲趁鶯聲轉金鼎香隨蝶夢殘碧汜
波清堪把釣黃塵風急倦彈冠外家文采唯君在笑我冰髭跨曉鞍

寄陳文卿

窗對平湖柳對門隔鄰鍾磬送昏昕水煎菊本傳家舊醅壓桃花勸客醺擬向
蠻溪誇鬢鑠爭如月窟養絢緼通家欲說先賢事兩岸書燈點點分

寄蔣遠靜

金紫家氈五百年城南喬木儼蒼然久知華屋慚卿長肯向深盃品聖賢虛白
衣窗刊墨譜硬黃冰硯補瓊篇年開六袞未云老桂斧重脩月定圓

寄鄭景尹

太傅東山臥白雲經籛勤拾付諸孫玉堂舊制毫芒見黃闥深功百一存

舊見中興

玉堂稿唯傳位詔一篇

金盃宅深春雨暗烏衣巷靜夜潮喧佳花奇竹勤題品莫學儒酸

老瓦盆

寄開元恩禪師

恩公遯跡闍門寺欲下繩牀謝不能露滴花光珠五采月涵江影塔千層石榴紅帽明如火海艾青氈冷似冰俛首西山人物論獨聽孤雁對殘燈

寄本中峯

天目峯前萬石蹲坐着晴晝白雲昏山河有象百神泣鍾磬無聲兩足尊古澗老猿啼子母荒林野葛斷兒孫空王法藏誰傳得不展袈裟不出門

題郝伯常雁足詩

深羈孤館鬢毛斑猛虎搖鬚障海寰玉樹已歌歸逝水羽書難射隔平山不須羝乳終回漢肯學雞鳴詐度關一寸蠟丸憑雁寄明年春盡竟生還

乙亥四月放還

霜落風高恣所如歸期回首是春初上林天子援弓繳窮海曩臣有帛書
中統十五年九月一日放雁獲者勿殺國信大使郝經書于真州忠勇軍
館營新

中統十五年乃至元
十一年明年奉使還

送王景先赴燕南僉事

一疏朝天罷柄臣河南井邑萬花新繡衣暫著明銀漢青鎖初辭戀紫宸朝膳
平反娛壽母露困直指活飢民清時經濟須公等佇見鋒車入覲頻

小院四月十二日牡丹始開乃單臺花也余將上開平作詩示瑾

暖風吹雨佐花開送我灤陽第四迴內苑賜曾傳側帶舊賞花宴有大側帶小側帶江南畫

不數重臺徐熙牡丹無重瓣者至崇嗣始有迴黃抱紫傳真訣媿白抽青陋小

才自是妖紅居第一宅年折桂莫驚猜韓魏公牡丹詩自慚折桂輸先手羞殺妖紅作狀元魏公第三王堯臣第一

初夏卽事

斜暉庭院樹陰移翠蔓交加靜對宜幸有花王能引酒慚無草聖助題詩雁隨
雲影還鄉近燕惜春光築壘遲蓴滿東湖嘗不得笑看羊酪寫相思

壽椿堂爲王正
臣作

嘉樹婆娑十畝勻，笑扶靈壽日千巡。
風迴空籟笙竽轉，雪壓長柯鐵石新。
欲從六龍遮赫日，佇看五鳳舞長春。
銖衣拂石方成劫，似笑莊生說未真。

送湖廣萬戶

壯歲軒騰碧海鯤，英姿玉立暎朝暉。
昔司魚鑰曾通籍，今佩麟符暫偃藩。
渚對紅蓮便羽扇，岸臨朱橘傲清尊。
郢宮疑在平蕪際，爲淪蘭湯些楚魂。

次韻宋誠夫二首

風雨寒簷雞報晨，書聲盡歲徹比鄰。
食貧不作三千客，射策端爲第一人。
吳郡壯游追子美，楚宮陳迹酌春申。
少年覽歷真奇絕，似勝宣尼厄在陳。
蹇驢入局走寅晨，落日相隨擬結鄰。
鴻蹟鉅編侔古帝，虬髯英貌想天人。
亥書深恐經三寫，乙令何妨著五申明。
世經綸須國士，宅年宣室願前陳。

高內宰母漁陽郡夫人李氏表門

高門槐柳綠陰勻，鶴髮浮光飭坐新。
繡出人間金孔雀，孕成天上玉麒麟。
萱花

北戶丹心烟竹葉初筵素臉真曾向瑤池侍清讌碧桃傳種六千春

壽劉彥良宣慰母夫人九十五

英英壽母步蹠蹠疑是瑤臺墮地仙眼見九朝全盛事身經三世有餘年百壺傳賜黃封溼束帛加恩繡段鮮指點斑衣聽訓語清忠報國紹家氈

送湛師校經回杭

寒峯雲聳翠霏凝蹇著青鞋侍帝庭貝葉頻刊塵几淨天花新墜寶臺馨兩翻荷露閒鷗立風攪松濤睡鶴醒絕世樞機真止水從今掩息晝堂扃

送雪竇長老校經回里

翠鎖松關疊疊高坐看明月負金鰲已將禪板傳心印暫下繩床披毳袍聖諦無聲機獨露經筵有誤目難逃塵中白髮誰消得歸掩山寮聽雪濤

送董教授之淮南主簿

爲上都教授多善績

五月寒深冰滿鬚碧天雲冷竟何如聽駝度磧心彌折隨雁還家計未疎禮殿競傳周籛籛論堂新整魯詩書明年又作淮南客蘆菽叢深看捕魚

寄上都子貞伯庸繼學三學士

侍臣親切見銀河不用虛無八月槎蟬報早秋歸木末龍拖殘雪度山阿琵琶雲冷相思切蹀躞泥深獨立多今歲同行詩壘壯飛觥擊鉢正橫戈

遠客三年親友簡絕獨開元鄰僧以書茗相寄

廿載神京汗漫游玉堂深處得無愁隨龍北上迷三伏送雁南歸憶九秋親友共嫌疏問信律師屢約勸歸休南湖出日西湖月應許明年共泛舟

進史明仁殿書事

大帝仁功徧八寰敢將鉛筆強脩刪寶輿花覆簫聲趁黃道松分佩影環仗簇金吾開雉尾香浮黼坐仰龍顏還家陡覺詞臣貴獨恨年深鬢已斑

寄開元奎律師

雙塔亭亭透夕陽芭蕉深處碧窗涼江神夜聽光明偈天女朝分解脫香齋鉢午空烏守樹經臺雲冷鶴歸房平生欲結西方社似怪淵明作吏忙

伯庸開平書事次韻七首

沈沈櫻殿內門西曲宴名王舞馬低桂蠹除煩來五嶺冰蠶卻暑貢三齊金鬢
醅重凝花露翠釜膏浮透杏泥最愛禁城千樹柳歸鴉揀盡不曾棲

尙方新製玉東西一曲生香舞袖低闌苑春濃巾角溼巫山雲冷帽簷齊前行
按曲停檀板內直催宣印紫泥可是年深慵應詔道人自愛碧山栖

身如病鶴倦梳翎往事猶存舊汗青伏日賜冰來上苑晚風傳竹度疎櫺承恩
裁詔心抽繭落筆誅姦眼拔釘惆悵當今人物論披衣危坐望晨星

客子光陰疾箭翎徘徊玉署愧紆青當堦翠影翻紅藥連瑣回紋認綠櫺賦擬
卿雲羞軋茁文追班馬黜灰釘北門英彥珪璋重朝論詮量比秤星

的的新愁漲碧波可堪跋馬上危坡明知風伯秋當路更候天孫夜度河沙磧
共傳歌敕勒陰山那復見延陀周廷王會須椽筆慚愧陳人奈老何

馬足曾窮五色河更將舌本品浮槎新聲促軫傳三疊寶構懸鈴鎮四阿短榻
雁來愁不奈小窗人去酌毋多白頭慵作東封頌願效諸生賦止戈

侍臣底用賦明河西海曾看貫月槎向矣伏蒲移塞外終然加璧耀山阿羨君

一鶚孤難並愧我雙鳧數似多舊讀韜鈴工七縱裏瘡從此願投戈

送梅叔章官東流簿

江水東流八百里縣市南遷五十家寒蘆捲風散晴雪野燐照川成暮霞眼看
平楚堪舉酒睡足高春方打衙都官之孫詩有種玉板日給飛龍蛇

次韻景尹觀菊

輪郭團團漢五銖身輕疑食碧雲腴翠蕤建蠹煙凝紫金粟搔頭露迸珠初日
正宜催玉立清霜那使作銀鋪城南兄弟空相憶插盡黃花更插萸
託根不復辨殊方朵朵參差列雁行暎日巧心端補袞迎霜生面似含香飛英
獨佩疑湘浦笑靨初鈿陋壽陽惆悵千林正寥落故將清冷鬪秋光

送杜輝卿還蜀

浣花溪上水粼粼化治能爲五色春奇錦鶯穿金婀娜粉箋花印玉精神百年
文物毛錐舊萬里車書馬足新仁壽堂前乾鵲喜綵衣歌舞動比鄰

送石上人還江西

圓帽方袍入帝都秋風惘惘意何如雪飛北口蘆花絮雁落南空貝葉書聞見
迴忘雙舴艋行藏無住一濺篠南泉安衆千五百從此跣趺滅太虛

送李巖夫四川譯史

玉雪精神映彩霞清秋馳坂忽還家心聲珠貫通三象目力機深洞五羝青簡
世傳端合繼黑頭早貴實堪誇子雲猶有江邊宅好續方言振國華

紀生書經罷歸還里

烏帽梭鞋四十程北懷鵬翼決南溟定須金匱題銀管不羨鴻都寫石經落葉
行堦疑急霰流螢穿樹似疎星白頭病客思歸切欲別無言酒易醒

示皇甫生

矻矻窮年皇甫生眼瞳如漆映書明神清古鑑金莖露佩雜寒英玉井璜暘谷
久知螢爝陋丹山深愛鳳雛清玉堂老叟端歸去龍榜蜚聲遲子成

再送紀生

荆國書臺有紀生眼穿紙背倍分明聲音雜比昭華瑄跬步周旋夏后璜賦律

意深慚篆刻詞華情近忌輕清老來贈語多謬誤歲晚相期玉汝成

鄉友南歸客舍淒然再次韻

雙槳迴波沒復生人隨帆影去邊明愁雲亂疊敷重席寒月初弦掛半璜漁泊
汶橋煙樹暝買團淮浦海潮清方牀獨坐愁無著萬籟笙竽奏九成

睡覺東西書燈猶明喜勉元達兼示瑾子

兩家聞見參臺閣諸老論思聳廟堂莫畏大名辭繼紹願超凡子脫輕揚文章
正始師先漢格律黃初謝晚唐師友淵源端有緒老夫推枕起論量

省中議事回元達有詩次韻

烏帽黃塵久帝城紫薇深處得陪行擬將直筆酬延閣欲抱遺經進邇英老去
病多傳桂酒秋來情重憶萼羹蕭蕭易水聲悲壯不盡襟期白髮生

馬伯庸以詩餽兔次韻

閉門膝六散銀星對坐罌罍白玉屏琴匣冷光棲綠綺壁騰寒燄起青萍凍雲
縹緲迷圓嶠小酌無何入大庭知我年來雙眼眊特分明視了殘經

十一月十四日駕至京城楊仲禮有詩次韻

金輿清蹕發龍城乾雪坡陀甬道晴師起晉陽戈盡倒令傳代邸轡徐行鸞皇
合奏雲光遏龍虎文章曙色明欲認雞翹新法從駝車深處聽鈴聲

題馬氏先塋記後

曹子貞求作自
崇寧傳至今

衣冠異代劫灰平眼見佳城歷變更曲水護田成委佩纖峯當戶似疑兵玉蠶
零落威王塚石馬縱橫晁氏塋威德獨傳三百載好將遺事述新銘

甲子立春

泰定元年新甲子天門上聖啓瑤圖日融凍樹青煙簇土坼晴蔬碧雪鋪五鳳
彩樓催羯鼓雙龍絳闕勘魚符侍臣廿載題春帖從此歸休拾澗蒲

瑾次韻復成爲隱居計

京塵二紀榻蘧篋近喜家兒報宅圖移石近堂雲亂擁栽梅當徑蘚重鋪留春
定合箋花譜品水應須置竹符鼎鼎南山看積雪青青古澗玩新蒲

病中玩易復次韻

丙寅老人五十九猶是先天第二圖桃竹杖輕藤杖換蘆花絮冷柳花鋪當陽
山立隨羲御後夜尸居奪晉符已識羲皇真太極不須黃獨與蒼蒲

三次韻

濟勝閒身倩給扶家林應許畫爲圖空巖有象飛泉舞古徑無蹤落葉鋪壯歲
思仙尋火記暮年制氣習陰符松花一七能消得猶憶南州筍及蒲

武氏母八十

玄髮離離聳黑鷗桑田滄海事如麻魚穿冰腹宜供饌泉躍江心可煮茶烏繞
楔門爭玉樹鸞開錦誥印金花閒居欲效潘郎賦準擬家園製小車

安山曉泊

兩袖飛仙舞玉龍曉來朝嶽日華東門當楊柳灣灣碧水貼芙蓉岸岸紅隔艇
茶香知楚客連罾魚熟總吳儂白頭已忘于戈事不用乘軒問土風

發御河

一棹黃流去復回飛沙積岸雪皚皚梨花亂逐沙鷗起燕子深隨野馬來晚歲

宦情初岸幘暮雲鄉思獨停盃
茶蘼滿架留春住知我將歸爲緩開

次韻砥平石

金門吏隱愧相如歲月逡巡翰墨疎
拄笏有時看白雁濯纓無復戀金魚
倦游築室成真隱作意還山了舊書
更與老禪深結社平生黑業總消除

次韻謝定水

禪板蒲團振祖風故將妙語起衰翁
青氈舊學慚多缺玉佩清朝愧罔功
直以簡編窺往聖敢將翰墨擬宗工
壯年永感辭庭訓晚歲何由繼五公

次韻昌國宗聖上人

海上秋潮候月生島中瑤草不知名
每思大士超禪觀獨恨秦王苦望瀛
龍吐戒珠殘照影雁橫梵字故鄉情
妙年碧眼才翻錦爲念衰翁強入城

贈徐秀才還里

西風擁騎出前郊紅葉玲瓏透遠坳
家近不須傳雁帛縣閒曾是用牛刀
蜚聲展綵春眠柳文思裁珠夜泣鮫
師友淵源吾豈敢會看翡翠聳林梢

送劉明叟治鹽事還省

海上銀沙百鍊成年年飛騎走縱橫人傳一馬二童至春在十洲三島生烏帽
多情簪菊藥瑤琴有意送潮聲經綸滿腹須時用早上囊封致太平

次韻答西山道逢原

招提遠在岩嶢上曾有耆龐說法來灑灑玉泉澄戒鉢團團翠柏護經臺平疇
隔水橫棋局遠嶂飛空擲酒盃聞道幽人經論罷支頤掩息獨徘徊

送章仲和教授之官池陽

亭亭秋浦玉芙蓉無限樓臺落照中定見揮毫題妙句更須拄笏繼高風當年
故壘遺金鏃此日清溪漾碧筩人世機心何日了持觴爲酌九華公

梅隱齋

萬藥疎明鐵石堅肯同餘卉鬪芳妍青雲覆幕冰承柱白玉爲堂雪作甃橘叟
不知身外事壺公唯識洞中天何人欲問調羹法一榻蒙頭謝醉眠

次韻鄭景尹重九四首

年年京國度重陽禁路風高徹骨涼坐覺衣寬藏宿土行疑靴冷怯新霜紫萸
曾憶童時佩黃菊須看歲晚香惆悵東山在何許挑燈無寐坐方牀

無復金絨與覆鞵屢看秋月缺還圓風塵自覺真衰矣勲業深思盍舍旃烏帽
塵荒憐遠客白衣酒熟慰癯仙深慚涉世脂韋久強項何能效董宣

還家兩歲見重陽過雁橫空拂曉涼尙憶傾心朝午日欲將勁節拒朝霜禽魚
有樂隨天性蜂蝶無知戀晚香從此林間端見一不妨枕易睡匡牀

久矣懸車徹坐羈天機渾沌黜方圓披沙經窟知非矣秉燭書林尙勉旃愧我
詞華端近俗愛君詩律已通仙門前種菊高如許亦欲紛披五采宣

齋前海棠秋日著數花壺首賦詩次韻

四山紅葉報秋殘駐目家林認未端螢點流星驚乍曉鳳銜初日怯輕寒鮮鮮
敏手攢新錦烟烟芳心吐故丹西帝已能回藻景爲言莫作杏花看

金祇當御衆芳殘忽見奇葩表樹端霞臉已拚千日醉絳唇自怯五更寒燈籠
錦就霞衣帔箭鏃砂成寶鼎丹政此淒清端慰藉停盃擬作百回看

次韻吳門聲上人

翠樾經院多高人

景德寺有翠樾方丈

碧窗點翰五采新天機不受梁燕語逸興直與江

鷗親羨君解衣浣流水愧我束帶陪禁宸屈指當今人物論從此有約同垂綸
至人天隱樂有餘良玉不願爲雕瓊昂昂盤石大坐相杳杳歸雁旁行書白蓮
解結碧雲座綠蕉不羨青葱裾道人緇經悟空假始信塵世非真如

憶雙溪

清溪明處水流萬井鱗鱗冠蓋稠杯凝玉光明月入幕遮翠影落花留雲生
古洞千山雨風送層樓萬壑秋麗澤祠前最佳絕藕花零亂勝滄洲

寄張希孟內翰

君方習隱食翠柏我亦採真歌白蘋千嶂遶樓堪岸幘百泉當戶足垂綸蓴鱸
水闊滄洲晚稻蟹田肥澤國春日夕相思看過雁客來無惜寄書頻

清容居士集卷第十三

元 袁 桷 撰

絕句 七言

團扇圖

玉樹秋殘翠影疎
掩門何處望金輿
昭陽殿裏渾閒事
最恨當年李婕妤

擊梧圖

萬樹梨園已失春
秋聲颯颯起胡塵
君王獨立梧桐下
不見當年鎖諫人

韓幹五王出游圖

花萼樓高怯翠衾
平明聯騎走芳林
讓皇可是無忠益
一曲涼州恨最深

夜讀唐將遺事二首

合江雨暗裂珠旗
鼙鼓鼙鼙怒促圍
不是帝羝車上去
元戎那得袞衣歸
雉尾雲深漢殿開
將軍鐵馬響春雷
太平未覩匆匆去
空憶君王白玉杯

秋山圖

簇簇麻姑十二闌倚空搖落總塵寰臥遊京洛誰消得一榻松風響珮環

童時侍先人泊京口旅樓一月正對江山樓繁麗特甚江津流民散處
不可悉數今皆不復有追憶舊事因成絕句十首

碧瓦參差第一樓風旗獵獵喚行舟兵廚有酒真堪飲不學弓刀也白頭
紅袖娟娟舞旋齊鑾江一曲唱尤奇西湖院落曾翻得未識君王知不知
燈火闌珊月色低少年乘醉馬東西樓頭畫角聲悲壯又聽歌聲促曉雞
白葦蕭疎野火焚流民草舍各星分沙田土瘦新耕得甘死江頭不作軍
朱門高插相風旗千里船行總得知稻米流脂江上去健軍何處是男兒
日日樓頭算酒錢峨冠太守號籌邊鳴騶傳入丹陽館爲是行都過客船
淮馬低如果下騮春風小隊打紅毬日斜臺上人爭看銀盃分明第一籌

明月曾愁多景樓幅巾長袖是清流金焦山勢元相望不揜諸公富貴羞

劉改
之舊

有山掩諸公
富貴羞之句

硯山園下將軍宅脫卻兜鍪強學儒聞說高堂擁紅粉醉翻筆陣墨模糊

白雲一去愁千疊此地重來百不如空憶當年覓梨棗小樓燈火了殘書

先人課子

最嚴時在旅樓不廢講誦

雪中招虞伯生祝丹陽

空林一色十分春羞殺高眠獨笑人喚取東坊虞博士紅爐同點奪胎銀
金芽初熟白皚皚袖手爐邊未盡開爲請招真老高士且須騎馬抱琴來

梁山灤

千頃芙蓉送我船碧香紅影弄娟娟梁山風景能消得不到西湖卻十年

支家口

蕩底天鵝雜桴聲南鄉今有幾長亭錢湖未盡滄洲興臥看荷花十二汀

黃河

乘槎使者問河源織女相逢事惘然從此競傳天上去不知滄海幾桑田

耿山

一簇山腰總賣薪語音猶是舊吳人江湖水闊從今住更肯輕生學買臣

古黃河口

温温河水似湯泉送我南歸意萬千入海定從天上去不知重會是何年

黃樓

詩到徐州不用題危濤千尺壓金堤羣峯翠盡蘇仙去萬古黃流日又西

伏日度淮

伏日陰盪棹船詩腸冰雪碧淮鮮黃塵自是人間暑不識薰風在五絃

過高郵

一片歸雲一片帆芰荷深處綠蒲灣鷓鴣可是無情思不及沙鷗自在閒

甓社湖

甓社湖中新水清風牽荇帶引帆行靈妃夜度霓裳冷輕折菱花翫月明

聞見

飛蝗眼見度淮鄉又聽吳田水渺茫總怨春來雪五尺變風變雨變年荒

渡揚子江

一舸中泠煙雨飄片帆閃閃浪招招倚闌僧在半空語南去北來今幾潮
俞光遠治余別墅口占奉謝

種竹澆花俟我還花成雲塢竹成山相逢且說相思恨更說何時得共閒

周子敬三年才寄一書口占奉寄

伏日松陰酒一壺抱琴身與鶴身癯故人天外慵傳信唯憶楞伽是舊書

聞仲正新得掌珠道中奉寄

知君已厭添丁事與我同看納甲書別後匡床清夢少春來又獲掌中珠

懷應德茂

瘦石支筇偈仄吟吳山雲冷越雲深江湖老盡誰知己獨聽寒泉響玉琴

明皇醉歸圖

日暮毳場醉欲歸停鞭更進紫霞杯老髯未省霖鈴曲猶願君王款款回

過故人墓

湖曲深深鎖墓田種松成本起蒼煙欲窮精爽周流處雲在青山月在天

送昌上人

江南山水一枝藤更上雲中第五層昨夜西風傳雁信露華如雪月如冰
方袍圓帽眼如鶩問訊紅衣不點頭剛道西天同佛住笙篴琴瑟勝南州

題葛仙翁移居圖

翁媪相攜入翠微轉頭猶有可憐兒丹砂不是神仙藥勾漏歸來鬢已絲

黃松瀑索酒

殘春聽雨元無著恰似槽床淺滴聲活水飛花誰駐得願隨小榼夜深傾

祝丹陽飲馬圖

天馬從來不受塵水清深愛自由身髯奴未識相忘處手控青絲強屈伸

舊春花下與東嘉周子敬聯詩有人到中年始憶家之句余坐舟中五

十日因憶此詩作俳諧體奉寄

平生愛詩復愛酒晚歲畏名兼畏茶年過五十不歸去底用中年始憶家
四明衣冠山水窟人道風流勝永嘉爾來愁絕各閉戶方信中年始憶家

我眠船中五十日飯有飛塵鬢有沙古言墨頭須萬里底用中年始憶家
春風一架爛金沙憶昨同醉遺烏紗山東禁酒不得飲方信中年始憶家

題鄭潛昭玉堂藁

雲漢天孫古錦機秋風槎上解相期迴鸞舞鳳曾翻得不用人間五色絲
春睡牽人渴思濃小窗誰贈密雲龍自憐舌本那知許急寫緘題似舊封

宮娥弈棋圖

爭先春色在眉端圍坐佳人著意看可是相憐饒不得東風自怯五更寒

求酒

爲愛雲房酒盜清涓涓殘溜滴春聲夜來梅月十分白嗅盡梅花看月明
輕輕梅花春風面卻似道人微醉時只恐花飛失君意更酌叵羅歌小詞
小詞歌徹飲叵羅一寸清霏奈客何窗外馬蹄猶不住誰道江南春水多
我家舊釀碧琉璃色壓花枝朵朵低頗怪春深未歸去花下杜鵑應亂啼

伯生約賦竹枝詞因再用韻

君家竹葉江水清我家竹枝三峽聲三峽水隨江上去迴首望鄉終眼明
簇簇青帘蕩子期飄飄紅杏三月時青帘紅杏總輕薄自展碧牋書我詞
暮雲纖纖如越羅勸子不去知子何桃花水深放船了卻憶關山塵土多
愛君酒滑滑如泥白眼義手頭愈低南鄰琵琶不堪聽自舞柘枝驚春啼

舟中得功遠瓊花露戲成三絕

瓊花瑞露十分清客裏相看眼倍明自是江南春色好錯教騎馬到京城
平生嗜酒不殢飲最憶停盃微醉時花下盈盈似相待莫教春倒最濃枝
繁禧觀裏花如雪留取清陰待我來應有真真花底坐生香一曲舞三臺

梁山樂

梁山水樂八百里容得碧鷗千萬羣愧我扁舟數歸路晚風掠陣入蒼雲
嫩草豐茸間軟蒲一川晴綠映春蕪平岡散牧分雲錦簇簇斜陽是畫圖
大船曬網小船罾知是吳儂喚得麈共說五湖難住卻朔風吹雨捲千滕

仲章以余賦瓊花露因成陽臺之句次韻

月下看花花氣清，羨君不飲更分明。
五雲破曉迴歸馬，疑上天邊碧玉城。
我愛瓊花賦酒詩，雪香憔悴可憐時。
平山芍藥開如斗，擬揀肥紅作贈枝。
相如肺渴非關酒，多病卻迴江上來。
可是春風消不得，白頭吟憶舊琴臺。

送危功遠

翩翩海燕近宮城的，的天鵝度上京。
癡坐江南未歸客，夜聽春樹袞潮聲。
居庸關外雪模糊，簇騎分明似畫圖。
猶有深春後歸雁，見君曾宿洞庭湖。
天柱峯前第一詞，風清月冷鶴先知。
京城可是無吟思，眼看飛花下筆遲。

送吳成季五絕

牆東杏樹花片片，隨風到馬頭。
只恐花飛不解走，度關時節暮雲羞。
北雪初消未見山，馱鈴聲雜佩珊珊。
廉家池館春風好，獨看牡丹惟我閒。
上京新酒玉津津，薄醉深春惱殺人。
截取當年釣竿竹，捲筒相寄不嫌頻。
詩瓢浙瀝風前樹，雪在深村月在梅。
從此不須生感慨，晚寒更上望鄉臺。
鼇峯路與仙峯近，取次詩筒日往來。
慚愧阿戎松下坐，洞門深鎖碧桃開。

長沙鄧醫年七十餘遊京師二兒扶小車得酒卽醉類有道者劉充之
號曰壽軒且令賦詩

大兒椎髻小兒丫拍手清天在小車剛道人間易榮辱醉歸齊插碧桃花
南極星明湘水邊七還猶是小行年囊中紫粉誰傳得酒盡君歸我亦眠
醉面頰如紫玉盤天風吹上月團團擬翻新譜朝元引雪壓梅花鐵笛寒

平原賈氏戲綵堂

鶴髮棱棱水石村飛花蛺蝶舞兒孫人間朱紫爭新取落日微茫政倚門
晚訪仲章不遇

小院春濃落照閒碧篁相對乳禽還晚風陣歇游絲盡留得歸雲在屋山

梅溪圖

玉人楚楚意逍遙隔水攜琴不受招迴首芳林真嫵媚春風歌館聽吹簫

三徑圖

遶舍山青流水新春風吹玉綠勻勻意行已復支筇去從此何須問主人

靜芳亭

簾外羣山當畫屏白雲如水度中庭
松花落徑無人掃失卻莓苔一半青

貯香亭

長安何處認飛花片片相隨十萬家
唯有碧桃天外種露華清淺玉交加

大年宿雁圖

寒夜沙汀睡已成雁奴翹首獨深驚
朝陵閒說燕王事恨殺人間兄弟情

次韻馬伯庸應奉絕句一十八首

玄都觀裏桃花句沈香亭前芍藥詞
今年春風似憐我明年春風更相思
肥紅盈盈錦步障淺黃深深綠油幕
絕憐舊嫁小娉婷一曲生香淚雙落
垂髻雙雙白馬郎看花不語愁晝長
堂前有婦不肯守遍愛吳姬與趙倡
綠柳高低千萬樹翠竹橫斜三兩家
妾非江南蕩子婦不許郎君烏帽斜
五臺山前雪如席千古萬古搖銀光
驅馬莫飲澗邊水澗水能令馬穿腸
小樓昨夜聽琵琶推手卻手怨王家
不辭遠嫁盧龍道可憐長城骨如沙

海南不愁珠翠少家家共籠秦吉了夜聽吉了似秦聲賈客年年不知老
紅衣夜唱娑羅樹云是西天好兒孫吹螺日飲官法酒笑渠騎馬傍人門
吳兒蕩漾楚兒癡酒酣垂手索題詩桃葉不傳渡江曲竹枝空歌三峽詞
老鶴攀松舞月色哀猿坐樹啼天光一喜一悲盡今古慷慨不如秦舞陽
誰家弄玉矜少年採蓮艇子歌娟娟轉首那知顏色老猶抹橫雲啼鏡前
京華作客不知老燈花明滅搖寒房爲問涉江下灑灑何如種竹滿簷簷
金門羽客恣狡獪清曉玄文總不看朝騎白馬穿閶苑夜乘白鶴下天壇
妾顏不比天桃枝妾心不如傾日葵羞著主衣當筵舞蓬鬢荆釵卻自宜
燕山芍藥大如斗千朵萬朵凝春煙健羨南京馬供奉醉著宮袍不上船
向會六月桓州住雪歇前巖散冰樹王郎馬郎太愁生兩騎雙雙辭我去
吳門艇子淮南船我慣乘之眼欲穿老來愛酒不得飲歸向桃源種秫田
烏靴窄窄稱宮袍雙鬢風翻見二毛聞道中山止十驛急須乘馬釀松醪

乘槎深夜問支機
天女流梭舞鳳飛
迴首人閒金粟尺
翦燈愁製五銖衣

逸馬圖

瑤池宴罷周王老
牛首蛇身騁怪靈
漢使近從西極返
龍媒元是世間形

試馬圖

二駿翩翩勢並驅
轉頭槽櫪總庸奴
秋風萬里雲容與
不用青絲強繫拘

散馬圖

秋盡川原草樹空
冷雲嗚咽似呼風
太平天子橐弓矢
留得閒身落照中

次韻繼學伯庸上都見寄

陰陰樓殿水雲蒼
鵲鵲風微夏日長
渾似醴泉宮畔境
千官齊立從文皇
紗縠單衣珮水蒼
碧牋裁詔繭絲長
日斜雙入通明殿
雲母屏前對玉皇
相思盡日鬢毛蒼
赤土塵深怨路長
忽憶鏡湖明月夜
藕花清淺棹餘皇

題危功遠山水

雲作模糊冰作棱
玉峯深鎖鐵崢嶸
欲問先天觀前路
釣叟捲篷終不膺

孔節婦表門

鳳逐麒麟天上飛，深鍾涼月獨鳴機。春風猶是人間世，華表亭亭護落暉。

墨梅圖

鐵石冰霜百世身，疎明瘦直一生真。玄雲借我凌寒便，直上鈞天試早春。
雪繭輕蒙絕點塵，小窗晴日得橫陳。夢回猶記溪橋路，黯澹相看喜似人。

蜀女繡牛圖

絕壁連雲翠木稠，五丁空作蜀王羞。浣花女子聞鶻苦，繡作春風萬古愁。

錢舜舉折枝菊

醉別南山十五秋，雁聲深恨夕陽樓。寒香似寫歸來夢，背立西風替蝶愁。

子昂控馬圖

雪積流沙冰歇巖，天池飛舞入穀函。奚官可是相拘檢，笑領春風白玉銜。

渡水羅漢圖

洞口泉分岸渺茫，意行的的水中央。相看總絕神通想，不用折蘆歸故鄉。

次韻繼學天寶宮禱雨見懷

小著羅衫涼似秋梨花寒重雪交流瓊林宴罷傳宣急不許祠官用虎頭的雲團白玉杯可堪羊角兩驂開松花深處塵如雪知是龍歸鶴未來千林紅紫鬪京城一朵姚黃露有聲惆悵可人何處覓獨行花下到天明新雨悠揚人未歸遠山凝碧綴雲衣捲簾擬作庭前舞點點團沙柳絮飛

送嶼上人

玉几前峯慘翠顏瘦藤挑雪度三關黃塵似作松花落歸雁南來我北還東南蕭寺梵王音禪榻蛛絲薛荔深我欲與君同面壁首拚雙屣挂松林東溪老子詩三略的的瑛盤貯夜光擬把玉簫松頂坐穿雲吹徹九天涼月暎寒燈雪暎簷故鄉夢斷酒初收因思舊宅梅霖後新竹齊抽碧玉尖

寄天童岫長老

太白山高雪四圍孤峯翠織五銖衣誰言老子寒無力獨擁紅爐更下幃

贈南嶽道士歐陽君

丹鼎芙蓉生玉床紫泥封固結玄霜道人急歸巖屋守不使月明騰夜光

崔白竹

昔年家住篔簹谷葉葉凌雲對此同近日畫師爭斂手垂頭疑在柳陰中

往歲南歸商隱長老遠惠佳句不獲承貺次韻敘懷

席帽京塵廿載強風前數髮白於霜芸編不檢蛛絲冪斑馬專門萬古香
桑乾嶺上是天心萬樹松花積翠深兩度灤陽三伏節片雲飛雪是晴陰
烏紗承笠霏霏土短袖持鞭窄窄風冬盡不知梅藥白春來深愧杏花紅

商隱長老以余歸喜溢翰墨愧歎之餘次韻以謝

少年學道惡加鞭掩息支頤絕語言玉几老禪曾對坐茶甌如雪閉寮門
沈沈雲頂絕天風不展袈裟萬念同眼見永師傳妙密虎丘殘塔夕陽中
龍歸石落無消息碧眼長身振祖傳江上白鷗元不礙潮回月出滿樓前

春日奉旨侍祠太乙朝罷觀齋中紅梅花

藏春塢裏功夫密一一羣英點絳脣共道紫皇分上瑞須知太乙露天真

斗柄分明指孟陬紅鑪橫簇化工收先皇寶曆今重建應許南枝在上頭
次韻砥平石

廿載冰霜興已終復於馬上送年窮雙峯閣上憑欄立疑有子規啼晚風
燕山長驛四十五雪擁金臺玉作層疑是黃蘗消不得何年投老得依僧
我翁綠野舊精廬樓閣連雲畫不如贏得高人敬枕臥膽瓶冰蘂樂冬餘
恩師高住湖邊寺清夏菱花閣錦波妙趣通玄鄰粲可清言協律近陰何
砥師平地湧金仙不詫虛空不說禪怪我往來增白髮雲龍新碾汲清泉

省庵

三十六宮春寂寂月華如水碧雲真空齋宴坐天心轉知是羲皇太古人

姚子中左司墨竹

雪花搖曳被春欺的的琅玕侍玉墀千歲玄霜誰拾得紫薇花畔寫參差

斗巖

搖光游戲下塵寰曾被山僧駐不還從此夜深隨鶴度玉衣清淺珮珊珊

歸德王瓊母表闕

寶奩香瑣繡羅衣不許春來蚊蝶飛得見慈烏好顏色門前槐柳引雞歸

西寧李處士碑

元復初作

堂堂吏部睢陽敘耿耿中郎有道碑點檢清河金石錄的於處士絕諛辭

博平王獻妻徐氏表闕

無子無夫鬢影蓬兩家王母事相同

王逢原妻宋史有傳

臨川妙筆傳青史我輩空令兩

耳紅

離宮圖

龍首渠開王氣埋淺沙殘草認天街當年金屋寒雅聚時有耕人拾寶釵

子昂逸馬圖

神駿飄飄得自閒天池飛躍下塵寰青絲絡首誰收得留與春風十二閑

通叟狀元以祕書滿職言歸泊然若無營者桷舊與殿廬詳定得通叟卷

氣完以充議者爭緘口今其南歸以子昂畫馬求言愴然以別吾徒之責

深缺然矣至治元年八月二十九日桷書

薛濤牋

蜀王宮樹雪初消銀管填青點點描可是春山留不住子規聲斷促歸朝
十樣蠻牋起薛濤黃笏禽鳥趙昌桃浣花舊事何人記萬劫春風燐火高

理皇題馬麟野芳佳木圖

上題丙午歲

重慶城頭翠木圍陽羅堡畔野花稀卅年竟換人間世弦管西湖認落暉

丙午至乙午

亥恰卅年

題寒拾圖

三人攜手共嘲吟古殿脩廊自在尋石壁忽開靈怪絕可禁飛瀑海潮音

舒貴和以黃菊相贈賞挹逾六十日短句奉還深碧齋

九秋風度玉精神的的寒英不落塵還向清齋調火候明年散作萬枝春

雲峯圖

融融洩洩互低昂絕頂瓊冠白玉裳聞道溪南三尺兩道人推枕召髯羊

楊節婦傳

鳳簫吹徹碧雲天
眼見孤凰淚欲穿
回首春風三十載
槐花如玉柳如綿

宮女賞花圖

一架薔薇錦障稠
滿庭蜂蝶替人愁
玉環已侍昭陽殿
側近傳杯得自由

宮女度曲圖

望瀛法曲紫霞觴
更按伊州奉玉皇
翠竹涼深宮院密
新聲那得過宮牆

靜中齋

玉宇寥寥星斗沈
千林籟寂印天心
羲皇猶是人間世
嶮谷參差不用尋

張氏承祜堂

幼弄青梅共繞床
白頭舉按話尊嫜
竹花已老桐花發
雛鳳參飛列畫堂

題何尊師醉貓

縱橫社穴恣穿窬
抵掌摩鬚不奈渠
賴有連錢能遣醉
晚風殘日臥庭除

題初平起羊圖

舊跨髯羊入帝青天瓢如注散清冷明知制氣歸吾手好與松間護茯苓
題鮮于伯機拱北樓樂府

氣湧如山壓海潮高樓明月更吹簫從茲徑直虛皇筆春蚓秋蛇擅市朝
簡馬伯庸

象榻香濃翠幌春美人倦繡態橫陳平明欲進朝天襪小立蘭燈熨帖頻
山水圖

高閣何人傲獨醒蒼松流水倍分明絕憐艇子搖山影猶與行人管送迎
書懷

二紀驅馳鬢已斑臨風數雁悟知還山中舊種松千樹從此歸休手自芟
三月廿九日女孫生朝今七歲久客京師未嘗食其湯餅舊見林虜齋
爲女孫作絕句事適相類瑾子云當次林韻且錄林詩于後

福慧曾傳兩足尊願將清貴屬高門大家女誠夫人筆付與袁家第一孫

憶昨華光待至尊袖香清曉候金門
舊留書冊今猶在時放漁竿教女孫

隱居放言

憐子憐孫玉雪顏更憐諸壻守家山若教總使紆青紫老盡京師更不還
古道寥寥世不聞麥舟高誼薄青雲邇來忽作苞苴看買得南宮免校文
以琴弦寄永嘉周子敬

五色鸞膠世莫傳春雷迸石響流泉永嘉七十四居士玄鶴來時就榻眠

堯民圖

泰定甲子題

衢尊深酌舞蹁躑鼓腹行歌樂自然共道帝堯新紹運九州重見上元年
育王長老見惠茶瓜次韻奉答

玉几峯橫寶塔前彌天消息是真傳蒲團禪板都忘卻似笑當時手指天
迸石春芽寶所藏枯松手拾許深烹能令星斗珠璣綻要使江山錦繡張
道人種玉光千頃深陋長安畝一金只恐冰霜難下齒特將妙語助清音

蜀江圖

三峽盤渦灑瀨堆層巒百丈鼓聲催從今盡向金牛路杜宇深啼喚不回

巢溪堂

風攪危巢樹樹秋更騎牛背濯清流舉頭總是人間世朝市山林且自由
餘慶堂

閉門春熟酒醪香深夜書聲度北堂不羨崔盧官譜好盛栽松竹俟成行
題李士弘墨竹

漫山桃李艷紛紛歲晚相看有此君昨夜墨池新雨過澹煙輕掃一窗雲
碧海無塵玉作壺琅玕清淺露流珠相思忽憶侯都史爲爾疏封墨大夫

題管道士雷谷

古竇陰陰一線泉中有伏龍方晝眠何人握固坐其下霹靂送雲催上天
盧溝符氏酒亭

茅屋疎煙報午雞金沙清淺水亭低羲和勸汝一杯酒勿與行人東復西
牧羊圖後有閻先生詩次韻感舊因成二首

嬰兒御氣草堤眠能使雙羊合自然莊叟不知蝴蝶夢覺來重作養生篇

玉質堂堂地下眠雲龍風虎各加鞭松陰舊日趨庭客整佩蘭臯駐集仙

李唐牛

穉稜原空蟋蟀吟秋來乞得自由身平蕪又見粼粼綠復與田翁共苦辛

閔思齊調閔府

榕葉陰陰荔子丹碧巖深處激潺湲秋聲只在瑤琴上曾聽龍吟杳靄間
道山堂上文書靜寺寺題詩滿碧蕉昨夜海神隨雨過綠牋爲作小詞招

水仙圖

日暮佳人十二鬟臨風解佩意閒閒當年曾立通明殿笑押蛾眉第一班

百鷺圖

紫宸深處立清班聽履雖難得自閒歸向江湖尋老伴展圖猶在五雲間

絕句五言

信州招真觀二十八詠

小隱巖

山鬼小兒足木精游女神據會學真隱下視飛花塵

馨香巖

深睡失明珠猛走飛流涎松花卷輕雨滴滴百重泉

學堂巖

露盤下金薤雲笈流珠纓泠泠寒巖下猶有嬰兒聲

鬼谷巖

縱橫太古石短長千歲藤感彼巖居子獨飲古澗冰

昇仙臺

寥寥入太清金門繚紫垣或云有官府微誦五千言

釣臺

垂綸落澄潭小魚儻然來大魚引之去釣石何崔嵬

一線天

茲山可容天舉世皆笑之我不答此語鼓腹支其頤

五面石

分一只成五五石各有一誰能據其上面面不相失

寒月泉

曉汲寒泉清明月各在缶缶空不見月引水復在手

金沙嶺

金沙雖爲貴履之傷我足愧彼側布人欲獲無量福

長生池

飲水人已去山中多白頭青蘋空淺處時見玉蟾游

老人峯

高帽側整整秀嶺深重重積此太古雪遂名老人峯

三山石

三山不可度絕壁峙書堂流水日浩浩太極彌茫茫

磑潭

沈沈無底谷央央太古雲赤日焦下土老蛟眠不聞

玉簾泉

截玉作明簾不知簾外事應有碧眼仙隔簾見人至

石人峯

滄玉未得法變形成楚囚九轉乞換骨三沐期點頭

仙足巖

山深猿狖驚瞬息下神步空飛本無蹤長獻上天去

月巖

顧菟樂嬉遨入地不得騁化爲白玉泉彷徨返東井

雷公巖

神鈞起空洞陰火生羽翰我耳若不聞白雲在天冠

道人巖

道人本無姓對客那有言龍口迸石髓鳥跡開雲根

丹井

金鼎閔寒泉真火彌不壞年深定飛騰子夜吐光怪

洗藥池

靈根乘月吠肉芝生土肥濯以上源水千歲永不飢

鳳山

孤飛千仞岡兩翼化爲石年年春風時山花成五色

風洞

罡風轉空輪浩劫不停息此爲天地根視之杳無跡

逍遙巖

形留非自在何者爲逍遙青松在谷口白雲在山腰

長廊巖

飛吟起霞珮馭氣躡天梯碧雲布參差纖脩與巖齊

龍口巖

弄月紅玻璃匿雲紫芙蓉近已厭狡獪納息玄虛中

靈湫

靈龜道其前游儵殿其後歲久深自韜清夜巖下走

朱窩楊柳青地近滄州余愛其名雅作古調五首

朱窩楊柳青明日是清明地下不識醉悲歡總人情

朱窩楊柳青客亭塵漫漫爲你多離別我生無由完

朱窩楊柳青黃河瀉如注還俟飛絮時相同入海去

朱窩楊柳青自愛青青好亦如遠行客相逢不知老

朱窩楊柳青桃杏鬪顏色顏色雖不同時節各自得

墨蘭

飛瓊散天葩因依空巖側守黑聊自韜不與衆草碧

仙人紫玉枝化爲水蒼佩獨立搖落中秋風得相貸

次韻宿清風軒

澥浦正覺寺

天風淨雲衣海眼卷石髮醉起撲殘燈獨看端正月

石湫二水橋

寧爲千丈清不作一尺渾古語有涇渭橋水何人分

虛一

欲問鴻荒事何如鼇極時三三與七七在手不須知

題應德茂游吳紀事二絕

澗束冰泉咽松懸月露清何人會真趣細坐與君評
聽鶴鴛湖曉呼猿鷺嶺昏十年南北恨無語獨銷魂

雲鏡

團團白玉光直入寒奩底昭徹誰爲容空飛本無趾

霧香

含章楚澤東晚思淒冥冥剖之久不食三嗅揚其靈

竹西

前導扶桑日廣招闡闔風天心須正位不必問西東

清容居士集卷第十三

珍做宋版印

清容居士集卷第十四

元 袁 桷 撰

絕句

五言

六言

挽詩

雜詩附

雙雁圖

秋風限南北何事往來頻並宿寒蕪際應憐自在身

六月二十四日夜夢剡源師同游山寺主僧延入丈室出梅花畫卷賦詩旁有胡用章先生坐主僧下時剡源對席僕居其次案上綠竹一枝青翠可愛剡源賦詩桷卽援筆

一白不受采重玄今罷論窗前有綠竹密雪打黃昏
漁樵問答圖

翠嶺邀黃鳥蒼波玩白鷗偶因平地坐始識世間愁

新安郡嶺南十詠

清江釣月

神魚竊金液爲龍復爲光平波無纖雲有餌不肯嘗

空谷耕雲

斜側龜背戲高下魚麗圖阿童踵其後黃犢爲前驅

蒼峯卓筆

仰手判虛空昭回爛星斗遂令山下泉復作之玄走

碧巘舒屏

古藤青步障曲曲靜相宜春晚巖花發生綃印折枝

楓林巢鶴

絕頂秋聲急盤旋作我家不須金掌露且服赤城霞

雪澗浮龜

飛湍齧雲根千載見五色中有九九文舉世人不識

峻嶺扶車

前行已可戒後行復何如懷哉王陽生靜言表其閭

圓岡揭斗

晞髮步上帝空巖泣山妖歷歷化爲石喬松導前杓

古寺垂虹

飛虹飲長澗垂首不能收僧從背上行水流橋不流

雙溪合璧

鳴玉抱山根上有金蟾翁指揮鐵如意化爲雙白龍

子昂蘭竹墨戲

玄霜落銀繭飄飄湘江佩服媚疑褻之碧窗靜相對
迸地鱗角精摩空鳳毛聳寒泓散晴煤桃李爭色動

題龍虎圖

玉淵發靈籟摩盪超九天調鉛靜召之帖首在我前
寒松翳幽篁得意當路隅急以真一汞坐令侍瓊瑤

墨竹四絕

謇謇凌雲志霜餘節更存春風宜管領生意屬兒孫

右老

奮雷初出地承露已淩煙願從朝元駕爲旄拂九天

右嫩

直道犯無隱虛心明且清側身思遠舉巖壑養深情

右風

曉沐換新綠萬采成空塵守黑心不緇同玄道彌真

右雨

墨蘭蕙四絕

金明秋林清月白楚天碧美人眇愁予服媚永今夕

采芝不成仙食薇難療飢結茲以爲佩臨風酌湘纍

天香落銀楮秋聲入玄筆何如湘夫人促軫鼓靈瑟

組綬何承承琲珠復纍纍相視不以色紛披暎簾帷

題悟律師詩卷

萬樹叢雲裏千巖急雪時世塵俱不到端坐誦君詩
壞衲翻經帙匡牀點律科看山無限思一一付吟哦

子昂枯木竹石圖

亭亭木上坐楚楚湘夫人因依太古石融液無邊春

六言

厚齋先生以詩借玩辭次韻

項子沈冥學古芸芸萬變觀爻閉閣清香宴坐斯人端可神交
已悟長年坎離更窮逆數先知補亡已滿三篋問事誰攜一瓶

題湖曲小景

穆陵御
題詩句

流水無言寂寂落花有意麤麤往事空餘華屋倚闌愁絕江南

送鄧師禹歸龍虎山

小帽飛花一寸輕舟流水三分落日獨歸洞口隔溪短笛猶聞

獐猿圖

細草豐茸古洞斜
柯歷落寒雲信道乾坤消息端
須類聚同羣

孤雲

在水同源一色出
山萬緒千條欲趁驂鸞整整更同笙鶴飄飄
規矩方圓在手輕清重濁隨形
宋子不須苦賦屈生爲我揚靈
白雁似憐片影碧潭深
暎無心獨上紫霄峯
半參差吹徹飛吟

題陳文翁畫扇

淡淡孤花欲笑娟
娟雙蝶疑愁無奈寒蟄得意竟
專落日啼秋

題美人圖

西施

辭家已意存越入宮誰解圖
吳故苑秋風麋鹿扁舟夜月江湖

昭君

鬢影愁添塞雪花
枝羞殺宮春誰道佳人傾國解
從絕域和親

馮妃

目送亭亭秋水腰迴款款春風爲問下車搏虎何如御坐當熊

班姬

望幸眸凝秋水倚愁眉簇春山已悟篋中紈扇須看鏡裏朱顏

洛妃

可怪夢中說夢底須愁裏添愁落日春風王子多情不解綢繆

綠珠

金谷煙迷清曉玉簫春怯餘寒可恨花鈿委地當時莫倚危欄

壽陽

一片花飛宮裏十分春滿眉端底用流酥點綴更煩圓玉搓團

張麗華

結綺塵空樓暗景陽春斷鍾遲紅葉無言在手同成井上臙脂

次韻潛昭焚香

意絕豈能生慧心
清定解通神
一穗黃雲滿
几故將綺語撩人
甲煎煙消吐艷鷓
斑湯暖凝脂
道人機心已盡
清坐唯餐兩梨
紙帳溫雲如醉
綺樓春夢成
虛知見何須
盡絕詩成要是
禪餘
宮樣昔傳心字
羅紋指甲爭工
往事桃花流水
黃塵蔓草寒風

潛昭九日贈龍團次韻

月碾舊裁玉
騰雲爐溫浴銀芽
九日殷勤相贈
淡羅猶記金花
閱世已成清玩
傳觀那識餘甘
寶篋政須千襲
瓷甌未許同參

題伯庸所藏子昂竹石

伯夷清宜典禮子
路勇誠冠軍
日落虎驚沒羽潭
幽龍走凌雲
胸中丘壑玩世眼
底煙雲凜秋岸
幘欲澆磊砢
解衣深聽颼颼

墨竹

蘆葉不禁秋色
柳枝那解春聲
醉閱小窗橫
幅風回雨轉
雲清

子昂墨萱扇爲湖南楊晉母作

墨蝶巧分釵股玄蟬高綴冠梁莫厭南州炎溽爲添北戶清涼

雪谷曉行圖

過翼淒淒巖谷曠懷納納乾坤我欲相思命駕人猶高臥扃門

高彥敬遠山木石圖爲記夢符學士作

身比寒厓枯木心似浮雲太虛落日前峯堪隱丹青渺渺愁予

復成

黃髮蒼顏並轡白雲青山比肩誰道風流已矣只今圖畫依然

春雲出岫

駘蕩巫山態度悠揚洛浦精神春去似歸闥裏月出端疑水濱

謝氏梅坡

謝家雁行兄弟一枝偏出南州低昂肯受殘雪瀟灑猶堪盛秋

劉生還廣信省親就試

萬馬隨雲北上孤鴻趁暑南飛欲踏三山海浪願隨寸草春暉

頤齋

多言不直杯水異味能生五兵何似深深閉息丹臺出日初清

禮闈倡酬乙卯

次韻禮部李公二首

明詔傳巖谷攜入帝京心同蛛網織意擬鵠巢營選德圭璋器掄材杞梓楹
龍門能化鯉端不負平生

又

黼坐思文渙號行鵠袍林立萃天京釣絲已具六鼇手彩筆誰專五鳳名寶鑑
懸空深照影神鋒躍冶莫容情百年禮樂重開運此道何須問兩生

次韻監試李仲困御史四首

高墉護脩庭列仗嚴棘闈昭代闡文治多士舒且遲謬言職緘滕晝日深下帷
昂昂子大夫咫尺瞻天威願罄悃款忠少奉白玉墀直言諒無隱寧懼菲與萋
中朝尊壽俊入徵垂安車念彼巖谷生惠然命來趨鵬飛企天池鳳息思高梧

煌煌六籍功不與稊稗俱。明皇燭遐邇，追琢璠璣與瓊雅。詠廣棫樸仁，風暢騶虞。高堂集羣英，搖佩蒼玉寒。朗鑑明月高，雅量滄海寬。上承丹扆心，舉逸脩廢官。繡童入關內，芝叟辭商顏。陋彼馬上翁，慷慨空溺冠。

皎皎鵠袍子，旅進翔廣庭。明時昭曠典，如醉眸初醒。稽古迺正學，敢言效桓榮。昌歎詎正味，咸池在希聲。古云儒匪迂，雍容佐文明。餘思續皇雅，黼黻歌昇平。

次韻郭巖卿

清穆黼坐更化弦，儒館集議招列仙。玉堂射策興羣賢，鵠袍賈勇思登先。輪囷奏牘誰三千，利若武庫森矛鋌。魏如繩直清廟壘，常山之蛇首尾連。胸臆結約言不愆，峨峨相國水鏡懸。手捧詔墨金花鮮，大爲梁柱小杙椽。令巖虎士齊烽烟，游絲日靜風翼翾。羣曹坐井難觀天，大鈞橐籥品物甄。代天有命司其權，鎔銖美醜精評詮。方臯相馬遺黃玄，嫫母敢作千金妍。工輪守度成方圓，萬目一口非幸然。斟酌損益牛無全慶雲，五色罍罍邊形庭。珠貫臚聲聯明堂，正席開九筵。扶杖觀化嗟華顛，煌煌龍榜天門前。金吾控騎青絲鞭，夾道動色爭駢肩。

詩書往昔成遺捐聲教不合今無偏瓦金之注同一挺慎勿逞說窮雕鐫皇元
文運齊天年

秋闈倡和丁巳

次韻席士文御史

至道白璧重小言浮雲輕詞場次後先理致貴坦明捧心匪正色偏師乃奇兵
駢駢白袍子昂首爭疾行味道絕嫵媚清心養和平謇諤御史公懼我遭譏評
當道謝駑駘朝陽歌鳳鳴

次韻士文感興

宣尼倦游躅冥思立天紀洗心悟盈虛應物合參倚羣雄爭霸盟騁意立私史
崎嶇東周君削弱絕統體約言正墜典執筆乃託始後王迭雄長正閏亂朱紫
說吻江海深短長爭四起大羹實鉶鼎玄冕表朱裏返真非無人末派失玄理
金碧騰虛空謂是可不死或言影響功駭愕壓餘子齊居玩芸芸作事首存悔
洗心探羲父變動實由己神珠守深淵光怪孰可比矯矯林中鶴潔白不受恥

紛紛堂下蟻聚羶亦無幾流光企羲娥慎獨守素履之人金石心年運任坎止
中年勇聞道晚歲復未已驅車望前川操轂敢濡軌

八月二十有二日范京尹同會秋闈天使傳召命溫問試策貢士賜以
法酒臣桷等望闕再拜以敘飲謦錄官翰林應奉臣翼述其歌詩謹用
次韻

五雲闈闔祥鸞流紫皇御極圖神洲魏煌京師首文化計吏四出巖阿求城南
儒宮極蕭爽古木落月凝清秋麻衣東西白鵠峙烏帽高下寒雅稠朱顏廣顙
粲胄子佩服礪礪懸吳鈎兵奇欲奪趙氏壁氣盛直臥元龍樓范侯機深妙彈
壓雞翹蚤歲承宸旒傳宣溫訓慎去取瓦釜勿以黃金酬宮壺午傳瑞露重翠
質績栗緘封周微臣望拜感莫語願上史館書徽猷百年墜典起盛世慶雲五
色開公侯興文云初道任重滄海浩渺難方舟眉山之蘇詎常士過眼獨賞須
梅歐夜闌心掉不得語瑟縮凍吻歌不休

次韻王正臣書史試院書事二首

貢士搜天巧經營縹緲間露蟲吟嘖嘖兩葉戰潛潛董買傳醇正揚劉陋險艱
銓衡同水鏡辱贈不知還

古殿蒼雲裏疎星出樹閒案燈光閃閃簷溜滴潛潛便覺登瀛易誰言與選艱
白頭心更苦滄海探珠還

次韻宋質夫應奉秋闈書事二首

廣寒清徹桂花黃影落空庭夜露涼七札巧穿誰矢直六鼇連舉我竿長神清
難入華胥國賦古須看古戰場一朵紅雲傳湛露夜深齒頰凝天香

草廬星列藉寒莎欲擬隆中事若何倚筆看天塵境絕袞辭翻海怒濤多持衡
要使心常赤題榜誰言髮盡蟠盛世崇文遍寰宇遺賢寧肯老巖阿

次韻席士文御史六首

煌煌文運起賓興樸學無知謝未能北斗夜橫東壁正露簷危坐獨凌兢
槐木森森雲影開諸生曳履起輕埃明河可是人間物端用乘槎八月來
文鋒鏖戰白差差沈著無聲午漏時掣海碧鯨翻古製翔雲彩鳳吐芳辭

倚筆看天思獨難，懸庭秦鏡敢藏姦。
東方射策三千牘，始信明時取士寬。
多病支離百不堪，挑燈眼眩罷清談。
廣寒果有娑羅樹，須踏天梯上蔚藍。
烏府先生玉雪清，論文沖淡去浮輕。
要令我輩平如砥，不使輿言負聖明。

秋闈倡和

丙寅
江浙

至治三年八月十五日乘駟騎抵榆林于時善之祭酒仲困學士伯生伯庸二待制同在驛舍觸感增悵今忽同校文于江浙因述舊懷

萬馬穿塵入渺茫，遺臣一日九迴腸。
碧雲碎碎琉璃影，白月離離菡萏光。
雁足無書來海島，龍髯有恨達衡湘。
誰知此日同文館，把手無辭醉十觴。

三十年前與倪仲深泛湖作中秋今幸同與校文中庭月色如晝短句敘舊

昔年同泛凌風舸，白眼論交屈指難。
楓葉參差山影矗，藕花淩亂水聲乾。
我方烏帽穿黃霧，君正羊裘激碧瀾。
歸隱始知人世換，無端此地更憑闌。

中秋柬周儀之推官伯明都事兄

氣與西山爽氣高
酒酣燈冷各稱豪
不隨北雪追燕騎
徑上南雲踏海鼇
桂醕的知侔沆瀣
蔗漿端可敵蒲萄
衰年投紱慚真隱
更爲君王選俊髦

汪叔濟推官鄭復初判官周本道判官同校文江浙因思歐陽充公王岐公事政相類不可無一言以成故事短章述懷

長冠黑髮雁行齊
讜對彤庭陋木雞
直以中聲生玉瑄
更將五采藉玄圭
文章瞻覈期穿札
經術精深鄙印泥
我輩直須雙目炯
肯令餘子誚昏迷

次韻段省掾

妙筆翻空歷杳茫
更馳紫電騁沙場
珠璣已綴三千牘
斧藻能成十二章
易水臺高招國俊
廣寒路近裊天香
相君盛德憐鴛劣
給燭分茶與激揚

再次韻

白頭歸隱髮荒荒
那識當年古戰場
文雉朝陽金吐綬
潛虬迸霧火爲章
才超董賈文如織
語壓淵雲墨有香
會見彤庭冠多士
始知我輩陋宣揚

挽詩

謝尚書

學易書臺地齊州有李鼎祚讀詞林起壯猷家空辭蜀道祿薄度南州曾知封州復為

廣東倉愛石雲生坐看書月過樓淒涼雨水曲風竹自蕭颯

晚歲功名異蒲輪禮數温嘉謀傳竹帛肥遯寄丘園散號南儒貴自號為勅賜南儒峨

冠北客尊冥冥乘鶴去空想典刑存

史觀文

奕世調元貴東南第一家紫綸傳密札綠髮擁高牙往事霜前木餘齡霧裏花

陽明真洞啓跨鶴整飛霞

故國衣冠聚凋零獨此賢勞生樂蟬蛻遺魄寄牛眠丹旄前官貴青箱舊物全

哀榮今莫比笳鼓鬧晴川

李宣慰思衍

宏才卓犖聳羣雌悵望心期晚歲違江海夜長談舌壯關山春斷客魂飛批風

給月文空在逐雷追雲事竟非神理繇繇那得盡冢頭新柏翠成圍

白首功名汗漫休一官鏃翮玩清秋終憐蕙苒難消瘴肯用蒲萄強博州萬事
浮雲今已定百年公論與誰謀羊生未灑西門淚落日寒江水亂流

史猷父

少小昂昂意長冠脫綺襦交游金谷聚談笑玉山扶舊雨三槐宅西風五柳湖
空令後生輩彈鋏陋爲儒

妙語千年簡英姿百世期忍聞淮水絕不見雍門悲往事雲歸壑空言水覆卮
相從今已矣寒淚滴冰澌

王尚書

秋水雙蓮孕英英吐異芬詞章納雲夢禮樂訂河汾丹詔三軍泣清名四海聞
西峯傾落日乘鶴叩蒼雲

晚歲艱難意衡門老病身蜀山迷望帝楚澤痛靈均皮弁終辭徵深衣晚任真
蓋棺今已定千載有遺民

燕說經生濫齊諧學究輕微言空有意獨拍已無聲墨澤雞林貴青氈虎觀榮

新銘前進士幽抱付誰明

再世登龍舊淵源許管窺西山遺正緒東澗結冥知腹笥名空在眉梨壽竟違
重歌妾薄命寒淚滴塵甌

楊夫人

丹桂香殘紫菊蕙轉頭何自失芳年錦裙舊繡空爲記玉軫新聲已莫傳散騎
文成殘月淚彩鸞書罷白雲仙人間總有相思恨不用松風激澗泉

潘少白

星曆張平子丹砂葛稚川書田終晚歲酒國送長年世味雲行水心期月印天
諸郎聞競爽蒼碣定重鐫

史湖州夫人

清白吳興守棱棱老吏師風霜塚上木玉雪閩中儀種德桑千本傳家桂一枝
春暉有餘報遺範合蒼碑

文集賢

家聲垂宇宙更作列仙儒
袁粲那無傳嵇康已不孤
金雞官驛暝白鷺古洲蕪
不盡修文意端從地下圖

死者不可作家兒常自嫌
奉輿薊門角叱馭越山尖
猿落三更淚霜飛六月炎
人方愛嵇紹我亦愧陶潛

前朝三百載慷慨盡斯人
天地有消息江湖多賤貧
許人憐老母叱馭作忠臣
邂逅成丘首猿啼似有神

黃夫人

錦堂鶴髮玉棱層猶是承平舊
典刑鸞誥日邊傳御札
絨鞍花外候仙駟
室如明鏡心如水
庭有斑衣案有經
回首人間真蝶夢
澗松搖佩起泠泠

悼章斯遠

學道求仙二十年
飲冰齧雪竟蒼然
錦機斷幅朝元賜
銀燭殘膏醮斗傳
役鬼有靈符絕筆
燻金無術鼎飛鉛
昨宵同我塔前飲
今日憐君地下眠

烏府先生聲似鍾
希年噩夢喜溶溶
擬看黃穎傳青簡
誰信方瞳學赤松
秋月

白於銀鑿落夕陽紅似錦芙蓉燕山雨水五千里從此空飛滅去蹤

悼張道士

海上神山十二鬟思君疑在有無間桃花褪水青春急柳絮團風白日閒芸室
燈昏螢閃閃藥壇雨冷竹斑斑宅生欲了重玄事煩乞神膏駐好顏

吳君載

金谿人

妙年玉雪佩幽蘭塵尾英賢接往還萬里出門車折軸九天無路虎當關青燈
黃卷家仍在古木清溪福竟慳賴有韓公三世舊已將椽筆誌瑤環

夏昭文

晚歲心清眼界平看雲投憤養脩名徒令化鶴悲滄海不見迴鸞下玉京觀物
無心玄草滿愛吟有句墨花輕蒼山日落簫聲急似有仙家白鹿迎

熊處士

三閩千古恨五柳一生賢石護栽花徑泉分種秫田松高青耿耿竹淨綠娟娟
欲識淒涼意埋銘手自填

危功遠道士

紅日翳黃埃騎鯨徹九垓詩瓢風歷歷丹鼎雪皚皚紫府調仙掌朱宮育聖胎
相期千古意獨立重徘徊

劉古昂教授

矯矯南鵬翼昂昂野鶴姿翦燈千古事彈鋏半生詩棋罷黃梁熟歌殘玉樹萎
溽雲催雨急相送不勝悲

成都何德之處士

蒲應奉其弟子也晚居興元

江漢清秋老岷峨故國身潛川珠玑璨韞匱玉孕尹逸興蟬離垢漚容鶴寫神
發硯經席正炙轂辨鋒新素業書千篋幽居黍一困非辭魯生徵自樂管寧淳
水近蘋交佩巖低溜墊巾詩清猿母泣詞整燕雛親夢往蕉疑鹿書成筆感麟
山觀天外象梅閣靜中春燐黑魂猶慘槐黃事可詢極知情惘惘徒意走趨趨
故里傳遺稿空堂象素真故人調鼎鼎弟子演絲綸靖節名堪繼文中躅可循
悠然端有意念此竟誰陳

吳饒公

種德槐三樹傳清桂一枝晚香年款款天爵歲熙熙大賚開茅社殊恩辨土宜
執謙容受谷詠道樂沿沂玉帶朝元服朱顏浴日姿菊泉便上壽橘井養清資
引竹藤侵屨看花柳拂卮跨鞍人共仰扶杖客爭疑霜暖柑分釀年豐黍作糜
黃封浮瑞露白醉擁晴曦京國輸甘旨鄉閭表羽儀齊年堂上扁通德里間楣
謂可疇離社胡然不憇遺烏傷情有感蟬蛻樂無涯孝養傾千古褒榮盛一時
誰成太史傳會俟侍臣碑

王秋山

翩翩玉雪養脩名絕頂穿松午日青別墅忽迴迎客犬空林猶隱讀書螢苔荒
琴薦春無迹風攪詩瓢樹有靈萬疊蒼雲埋玉去好將銀管寫沈冥

廬陵李主簿

應珍

青衫黯淡畫圖中雁塔塵深進士空可恨餘勳收汗馬極知往事費雕蟲暮年
榮辱非吾意此道升沈屬至公松竹蕭蕭自今古清秋裁些託冥鴻

趙令人

永陽郡王
與某女

靈漢雲昏彩鳳沈
參差聲絕露沾巾
高堂玉樹竟芳殞
寶篋金花空素陳
鮫室不知珠滴淚
仙壇曾見海揚塵
百年精爽真冥會
一掬清溪是劍津

吳夫人

上饒徐覺
民主簿母

玉樹彫殘浩劫遷
棱棱鶴髮獨清全
種桑不作十年計
指廩能生萬竈煙
白璧養成玄圃失
華堂歌罷板輿懸
坡陁積翠松千本
準擬飛雲歸墓田

黃如山

兵後還家意苦辛
白雲零落淚沾巾
松花麩蜜廚常淨
貝葉書經筆有神
蝸角可憐蠻氏國
鵑聲猶記蜀王身
白頭編簡成春夢
的的餘勳付後人

劉伯宣中丞死三十年延祐丁巳歲始得謚忠憲朝中各爲挽詩

烏臺雲黯柏蕭蕭
秋雨聲悲廿四橋
置獄可能生長倩
入門端不祭皋繇
墓前飛鳥傳新象
身後騎鯨下大招
聖代昭明青史著
願將直筆紀姦妖

東平段衛率

壯歲投鞭夜渡江前茅親受百城降後車長物唯書篋別墅閒情獨酒缸燕憶
香銷塵滿榻鶴驚琴冷月當窗傳家舊有贏金諺手種堦前壁一雙

何德之處士

雪色鬚眉兩臉春市中能作笑雲人簪花欲舞烏啼急放鶴初迴蝶夢真茶竈
煙收門掩晝詩瓢風動筆生塵婷婷小女思翁醉欲翦巾紗淚滿脣

家賣烏紗染入得宜

士夫咸取之

播州宣撫楊資德

掌武傳無敵崇儀續上多精忠書竹帛英譽蓋山河絕北驚遼海投南鎮大和
襲封縞滿篋錫誥錦成窠皎皎明玕樹亭亭碧玉柯之無文綵認宮羽短襦哦
魏帝奇何並唐皇悅李過幼成端有種帝鑒的無頗玉帳龍韜祕青箱鳳篆摩
教民風偃草撫俗水旋渦斥境嚴銅柱征戎指鈇戈雅遊春結佩小隊曉鳴珂
士飽歌于薦軍懽醕叵羅追亡窮古澗濟勝極幽蘿寸地歸王化羣蠻守詔科
細氈侷密纊善馬敵名馳客有依劉感人傳嗣產歌氣融汶領雪量納蜀江波

葛相功猶在韋王事若何雲仍賢莫比君長禮無苛閉戶時披褐看山蹙脫鞞
填詞鶯轉切促軫雁聲搓芝嶺圖空想桃源境類訛盛年真國器妙質竟山阿
世德蟬聯備家聲驥子峨播川彌震耀峴石詎沈磨

真定史萬戶

高陽之徒也至死忽題詩而逝

一身蠶作繭兩曜蟻旋磨投筆人境忘長歎泉下臥

月流白羽觴風送朱絲弦欲識無生樂熟睡三千年

玉雪陽春五十年詩成書罷珮翩躩擬將北斗爲罌缶不向人間酌酒泉

臨江熊君

浮湛元不礙清影透溪扉木落行雲泣山空病鶴飛詩書誰素業江海獨天機
此意何人會哀笳慘暮暉

至治丞相挽詩次韻李仲因學士

重玄開葆命上聖席蘿圖盛德函諸夏深仁浹八區降靈申作翰稽古禹陳謨
初日行黃道羣星拱紫樞神羊庭辨直貪獸鼎垂模纁帛招賢俊鋼金辟佞諛

撫牀論密勿借筋契都俞明月青銅鑑中秋白玉壺律成懸象魏禮缺補鴻都
士進三千牘姦誅十二衢彌縫前後正損益古今殊相業專橋梓英標瑞竹梧
癡蟆元有兔猛虎果非羶內坐占華蓋中階仰泰符令嚴顛白帝漏下候黃姑
萬騎玄雲蔽羣狐黑夜呼銜枚兇有約解帶僕云痛象燬端因齒龍眠竟失珠
聞驚燧人氏事異夏區夫闡戟交馳驛重弓競接途殺青誰執簡泣血漫成湖
史紀羹臯賜經傳齒馬誅陰氛動天地遺痛感樵蘇故壘煙攢棘荒原燐積蕪
邦刑窮勦絕陽澤起萎枯趙氏兒猶在山公汝不孤勳名昭令甲精爽與天徒
帝所隨陞降神山辨有無

雜詩

破衣僧

檀花楮絲臬纂新迺成弊鐵械及肉身剛柔亦摧毀真空埽真壤大願開大知
渴欲飲清泉飢欲思美味隨彼所願心以解嗔惱累王侯與長者糞土金玉貴
何以慰彼思長壽只歡喜壽本同我衣仰箭勢還墜堅忍及精進設衣以自譬

懼彼不信我投焰五采異老僧機已寂贊歎非本意意絕道始彰從此斷三世
熾盛光佛偈

寶光生虛空旋如火車輪肉眼一見之欣怖難思議謂光由身生我身與汝同
口眼鼻舌心光亦何從出無生亦無滅是緣定慧成衆生受五濁七曜日鑒臨
四餘在虛空摩盪不暫停列宿直四方好樂各有職或增彼貪嗔或增彼淫慾
居處各侈靡恣飽窮膏脂天神與魔鬼行住陰伺察爰假躔次環俾汝作疾忒
佛言彼有罪須當盡懺悔若更攘割之安得名慈悲矧此缺陷世植果會有因
畢既從是消福亦從是增般若無損益萬念墮積劫還彼清淨根衆生永安樂

綠陰堂山偈十首奉寄開元斷江長老

綠陰堂前碧樹齊千枝萬枝雲萋萋生臺不令鷓鴣舞禪板時許倉庚啼
綠陰堂前春筍生大著錦綉小織成老禪一點頭角要使參天來鳳鳴
綠陰堂前初夏涼芭蕉爲扇椒爲漿日汲井華三百斛側聽漁父歌滄浪
綠陰堂前古佛身劫火不壞金色新笑殺丹霞斷知見暖得病軀生障塵

綠陰堂前萬境空掩息不語超鴻濛有人立雪問大意山神泣走號寒松
綠陰堂前自在時不拈公案不題詩僧來住夏與竹杖客去逢春贈柳枝
綠陰堂前秋葉彫湖翻白浪魚龍驕我有鐵鉢水一勺彈指送爾歸扶搖
綠陰堂前夏木清千紅掃盡雲層層有僧忽問柏樹子斫卻柏枝僧始鷹
綠陰堂前結小參以手直指車司南現前虛空付大梵過去功德歸瞿曇
綠陰堂前合自然不學吟詩不學禪應許清容老居士睡盡高春猶愛眠

還源庵

沃焦山水歸東端與銀河一點通誰信道人能掩息手提渾沌擲虛空

清容居士集卷第十四

清容居士集卷第十五

元 袁 桷 撰

開平第一集 甲寅

延祐改元五月三日分院十五日始達開平得詩數篇錄示兒曹

居庸關

太行領羣山萬馬高下拜平巒轉城隍隱隱南北界危坡互交牙寒溜瀉泮泮
陰風玄虬湧巨石忽崩壞周遭青松根下有古木砦石皮散青銅云是舊戰鎧
天險不足憑歷劫有成敗驅車上林杪出日浴光怪肅肅空巖秋天風迅行邁
雨中度南口

山寒絕禽鳥獨聞子規啼石壁飛雨驟衆木搖淒淒瘠馬蹴亂石高下齧其蹄
陟巘沮洳深漸覺所歷低暝色起亭午土屋流寒泥須臾過雷聲倏忽生晴霓
水清亦可渡戒僕踰前溪

重午日宿南口小店

寒雨鳴石峽蕭蕭五月秋道逢采藥人不識葵與榴氣清諧令節暑溽想南州
涼颼木末來動色思重裘猶持一卮酒慰彼湘纍愁

桑乾嶺

漠漠清都近天梯爾許長青帘矗山影烏帽拂雲光行客穿珠曲居人綴蜜房
端窮萬里目那惜九迴腸

渡懷來沙磧

沙清圓石瘳千里聞風聲驅此穀棘車索索莎雞鳴遠山列翠席近坡環碧城
高下各有險轍迹那由平驚兔導我前歷錄爲之驚天低雲搖蕩土曠塵縱橫
謬膺翰墨選遠行有期程迴頭望南坂初月隨風生

草地

帶水殘沙似暗潮平坡軟草綠迢迢不須迴首更南望下馬同兒摘地椒

龍門

瀚海雙龍鐵鱗甲捲壑擎雲蹲冀闕千泉百道湊東南急雨翻空迸晴雪古言

神禹功最多導山鑿石疏九河幽都之地不復顧迺使雙龍下地成盤渦陰風何颼颼磅礴太古秋崩崖落車礮怪木森戈矛碎沙晴日鋪金甌云是昔日當關挽勁之僕姑寒泉組練結九曲亭午赫日光模糊車聲何鑾鑾昨宵急水迷無津垂堂之言猶在耳游子商人行不已子規徹天呼我歸翠華北幸那得辭龍門之石高不磨泚筆書我龍門歌

彈琴峽

在居庸

寒泉飛玉峽誰彈使成聲下有戰士骨嗚咽水中鳴絲石本異調摩夏生虧成鑿跡匪神禹佳兵構秦嬴駐馬爲聽之逝者何不平虛牝納新雨急促濁復清重華初省方百神靜相迎爲作薰風弦散彼巖下情

雲州

天闊雲中郡剛風起沱寥氈房聯澗曲土屋覆山椒幢布朝朝市通薪戶戶燒遙看塵起處深羨霍嫖姚

次韻虞伯生題祝丹陽道士摹九歌圖

玉眸精佇朝玉皇五采萬物迎初陽神鈎空洞光茫茫瑤席合奏樂未央沈幾
經綸自爲章膚寸帝青下填阬朝挾朱鳥招八方旋轉風輪盪金剛君山之峯
喻可望玉女鼓瑟哀不傷世職玄籍元運昌靈壽給扶顏色蒼賜齡金篋難度
量仲氏之道誰爲長深根抱一真有常下憫濁世生復亡浴精昧谷暎扶桑寥
陽昭德森九芒亘劫永寶天地光安流舒舒復湯湯儼思白壁謝汝將歷險有
戒毋垂堂乘狸從豹何陸梁菰蒲炬糝弦管張積變不化游益荒屈子調苦心
忠良歌罷雲遏投靈湘簫巫鼓胥紛莫詳巖巖祝冊遺鉛黃握管用九神歸藏
出入森衛視錦囊

伏日書懷二首

伏日急雨來端坐披重裘中天異寒暑茲維帝王州碧草記初夏堅冰在餘溝
野曠無留禽積潦不復收飛雲屢晴陰蒼莽天宇秋營營壁間蠅就暖旬日謀
玄冥自成歲高下各有求悵彼南飛雁素心愧難酬

晨起萬竈煙墨雲何輪困念昔種松者用志良苦辛寒沙草漫漫萬騎來無津

樹之似雲柵積雪迷秋春大車棟復楹小車櫛與薪空餘千歲脂成此官路塵
我衣素脩絜斲汗不敢嗔俛焉拾餘煤作書記其因

題李士弘學士畫明復齋風竹

虛聲出素壁泠泠天地秋矧此三伏涼居然索重裘盪摩神光旋戛擊玄露浮
浩蕩白玉京頃刻瀟湘洲昂昂員嶠仙筆底寒颼颼高齋襲道氣深根澹無求

慈雲堂

周南翁
祖母

萬竹鳳岡下虛堂聳翠微隔林聽返哺前嶺望孤飛山立斑斕服牛眠錦繡圍
諸孫有遺範致樂報春暉

南翁近築致
樂堂奉母

送濯伯玉之官雲南

蕩蕩哀牢國耕桑換不毛皮船乘驛穩銅鼓報衙高事簡歸王化民淳汰吏曹
端知清淨理山水縱遊遨

次韻玉堂畫壁

至人悟窮達斂迹寓壟畝良苗貴深扶擲土戒蒿莠靄靄新陽浮高下接紫宙

跨犢東南行問事一俛首新雨瀉溝塍交流媚川后輟耕非素心帝命資左右
相彼前山雲倏速復還岫卷舒樂槃澗署壁寫其舊清秋映空谷風雨百神守
夙昔經濟姿志不在杯酒要使風俗淳斯民樂仁壽

秋谷耕雲

明月入水底摩盪空江雪昂昂垂綸翁在雪不在月悟彼玄化理不寐坐明發
我舟非無槳我車詎無軌迂儒守繩樞世胄貫華閥願以千尺竿裁為濟川筏

寒江釣雪

再次韻

粵商有阿衡肥遯樂畎畝深耕力其勤嘉穀寧有莠時來起丘園勳業冠宇宙
持此金石心黽勉佐元首維敬在一德維訓守先后高風邈難追白雲在前岫
堂堂匡濟功匪以夙昔舊譬彼執御人先道謹為右精忠百壬避正色九關守
我昔夢見之再拜酌卮酒空谷秋思深圖之奉千壽

維昔師尚父垂老鬚眉雪突兀江海姿韜精忘歲月坐石投其竿祕籥時一發
載車與之歸在德不在軌念昔經濟人事定始功閱寒江眇風濤乘桴可如筏

上都客舍士弘爲作風竹

門巷泥深笑獨清此君蕭灑未忘情無端昨夜風花急卻送秋聲作雨聲

金主畫孟浩然騎驢圖

生前明主已遭嗔身後君王爲寫真家國總緣詩句廢灞陵猶勝蔡州塵
木葉山前雪似銀軟裘難作自由身想應晚歲朝陵後故寫騎驢處士真
北闕明言不上書蹇驢何自入西都開元天子元無分留與他生作畫圖

李陵臺

矢盡誇空計未疎囊封朝奏似憐渠漢家天子春秋責從此降臣直筆書
雪袞寒沙風袞灰眼穿猶上望鄉臺隴西可是無迴雁不寄平安一字來

上都楊節婦

吹徹玉參差孤鸞天外飛匣藏身後劍篋寶嫁時衣壽樂厖眉聳心清鶴骨肥
諸郎新玉立孝謹報春暉

開平第二集 己未

登候臺

蜿蜒西龍岡綠草搖晴波旁有雙玉井石角增嵯峨明良佐神運目力窮坡陁
層垣睥睨雄寶構通義娥昂昂鐵竿聳飛鳥光盪摩土屋粘蜜房文旣圍錦窠
緬思皇猷遠默止松林戈匪以清暑游跋履勞鳴珂陰森晚色晦寒沙聚羣駝
悲笳月初上戴斗瞻天河

次韻伯宗同行至上都

游塵捲飛蓬積水翻驚波羣山擁雙闕勇勢凌岷峨藉草各小憩側身復登陀
織峯脩眉聳佇立愁湘娥仰視北斗光煜煜疑肩摩田父指我言昔日摎鵬窠
吾皇罷畢弋射生久投戈二客何舒遲直可鳴朝珂銀鬕傳綠蟻翠釜登紫駝
出處愧我異愛君筆懸河

再次韻答李彥方應奉

良會難具陳歲月流頽波念昔邂逅初黑髮雲冠峨羣公擅碑板雄文記頭陀
于時接英武奉身如素娥粲粲白玉署墨沼爭漸摩所思筆成塚不計印積窠

君時皎冰雪正色羞倒戈習隱吏金馬弔古師銅駝瞬息已廿載愧彼桑乾河
伯宗再次韻復敘舊

玉署日倒影綺窗水迴波堂前雙琪樹暑清綠雲峨君時坐其下涼漪起陂陁
悲商激湘纍急羽凌韓娥執簡諒且直惜日勤編摩盛世昭休明卑枝鳥爭窠
掀髯紀其瑞刻佞侔鉛戈占風念靈烏聽水悲老駝俯仰各努力解珮投于河
伯宗遊華嚴寺次韻二首

平蕪寒磧際突兀梵宮尊白石開金地青蓮擁紺園城低千嶂擁塔靜一鈴喧
夙昔莊嚴果無言急掩軒

欲問生公法年深不上堂斷雲成密樹深柳當疎篁十地三乘要諸天百和香
玄機吾素解何日勤禪房

上京雜詠

雲護中街日風開北戶天千溝凝白雪萬竈起青煙午溽曾持扇朝寒卻衣綿
松林空有界翦伐不知年

土屋層層綠沙坡簇簇黃馬鳴知電急雁過識天涼墨菊清秋色金蓮細雨香
內園通闥苑千樹壓羣芳

天闕虛無裏城低納遠山白榆迷雁塞青草補龍灣市簇家家近官清日日閒
重游深問俗漸恨鬢毛斑

舊歲寒冬惡霏霏土雨迷門荒懸馬草草淨絕牛蹄列帳煙光慘空營月色低
縣官捐粟帛歲晚得扶攜

上國饒為客天涼眼倍青白魚沙際網黃鼠草間翎芍藥圍紅斗摩姑綴玉釘
漸知塵骨換振佩接青冥

天錫清涼國晴霞綻雪峯月低疑墮兔雪近得攀龍寶鑑頒冰撤筠籠賜果封
白頭貂帽客為我話深冬

鼙鼓村村應傳更趣進程草肥涼露白樹薄曉風清帳殿橫金屋氈房簇錦城
屬車流水度細點侍臣名

伏日瓊林宴名王總內朝帽尖花壓翠衣角錦團貂炙熟牛酥苳醅深馬乳澆

柘枝旋舞急宛轉稱纖腰

市狹難馳馬泥深易沒車凍蠅爭日聚新燕掠風斜晚汲喧沙井晨炊斷木槎
閭閻通茗酪俗簡未全奢

長夏崇真館疎簾灑靜便支頤推萬古止息契重玄月窟窗如雪天瓢酒似泉
主人憐老客下榻不曾懸

再次韻

帝京環陸海平野接冰天龍吐青林火狼沈紫塞煙風花秋黯淡雲葉雨連綿
昔日君臣意深符卜洛年

寶閣凌空涌金壺暎日黃梵音通朔漠法曲廣伊涼御榻惟經軼宮爐獨篆香
吾皇清淨德銀管願垂芳

高下雲中樹疎明雪外山坡凹茅結屋嶺轉水回灣禁路分馳道沙場當內閑
通明風露冷時許侍清班

晨起儀臺立煙青望眼迷草低鷹側目車逼馬迴蹄風勁弓弦直泥融柱礎低

蚊蠅深斂跡塵尾不須攜

紫極中天正森森接帝青雁歸傳帛信雉落舞紅翎寶所金千頃朱門帶萬釘
瀛洲清淺處高坐納空冥

昔年曾扈蹕宿直對鼇峯錦掣蘭苔翠波翻墨沼龍起居青簡注除拜紫泥封
共說先皇日千官總住冬

土驛高低置蒼茫七日程馬通分熠燿牛酪注深清殘雪明珠闕繁星列火城
前山黃白處草藥不知名

千堞蜂腰凸羣山馬首朝沙場調俊鶻草窟射豐貂鬧舞花頻簇狂歌酒恣澆
今年春事減土舍雪齊腰

箭洛驚遊騎鈴傳督運車土風殊楚越驛道倣襄斜細雨三更枕清秋八月槎
夜聽繁管急漸習五陵奢

長齋孤館靜捧腹睡便便酒斷眸凝碧塵深鬢返玄凍蜂粘暖草乳燕啄冰泉
過翼時頻數鄉心日夜懸

李陵臺次韻李彥方應奉

前坡聳頽基云是望鄉臺往事已歷歷亂石何鬼鬼想此二子別袂結不能開
河梁白日速朔風衰沙堆漢法重失律輕生表奇才一跌不得返歎歎壯心摧
形影胡越分骨肉參商乖萬事已瓦解誰能寫余哀昂昂司馬生義色興壯懷
子卿固偉節屬國何低徊褒功實譴淺議刑良刻哉坐令衛律輩歲望邊城來
次韻李齊卿呈閔閔嗣師

清都逼紫微瑤光流玉壇陰厓太古雪伏日生午寒澄懷集遐思黑髮竹皮冠
玄關轉輕雷銀潢激層瀾取彼白石詞寄以朱絲彈一彈去日短再彈行路難
兩曜疾飛隼歸雲生樹端遠游感夙昔努力慎風餐

西京李齊卿讀所贈吳公詩愛之遂次其韻

温温紫玉姿陽休升觚壇維時夜氣肅璇璣動芒寒辟公閱多士謂宜錫玄冠
環水會文海俾爾揚清瀾東南有高樓繁吹和急彈我獨念子意希聲世知難
遺情寄寥廓冥雁渺雲端去住靡所止精思勿忘餐

伏日

伏日陰陰九月天雲邊桂露十分鮮侍臣已入清涼境不到凌虛未是仙
偷桃曼倩語言尖伏日歸來割肉廉那似蓬萊風露冷重裘端坐絕趨炎

松林行

陰陰松林八百里昔日相傳爲界址玄雲捲甲天馬來雪兔霜狐先委靡山前
犬牙十六州石郎屈膝輕相投淺沙圓石古轍迹草青草枯無盡愁 拂天

鎮南北萬井燃松煙似墨大車太古龍角全小車輪困束矛戟松花落子 復
抽不如昔日當道稠採薪之人不辭 出郭十里爭相酬君不聞雪山之西銅
柱南混同鴨綠成東漸金山橐駝爭貢寶翦取平林作馳道

採摩姑

官山摩姑天下無迸石菌蠹攢寶珠阿香執御雲中驅天瓢急注爭葩敷玉京
高門散金鋪剩欲點綴完無膚萬釘寶帶山澤癯圓如佛螺綴頭顱累如柘黍
連二稔羶根未許相模糊剡泉石鼎鳴笙竽急投小烹養甘腴上池三咽生醞

翻五芝高著神農書吾欲比之議匪迂天花代北巖貢輸永言定論兄弟俱

尙尊賜張上卿薛玄卿賦詩次韻

龜眸鶴骨煉純陽言合靈著行有常黼坐近瞻堯日月屬車遠度漢封疆英雲
玉佩開仙府湛露瓊卮出尙方可怪相如多病渴願分金掌接恩光

再次韻

居庸曉次日初陽肅肅龍旂出奉常獸殿頻趨恩有秩鵲爐深祝壽無疆冰壺
酒滑通真一雲閣香清接上方靜夜屢陪談塵樂燈搖寒燼目搖光

復成二篇

羞逐羣芳度豔陽丰神弘景筆元常氣雄轉旆攻秦壁色正登壇復魯疆易玩
天皇遊太古書看王會補殊方平生物論深涇渭寶鑑懸空背透光
孤鳳清聲出嶧陽冲天采羽越尋常清心侍帝真醫國束髮從師屢出疆明月
乘鸞通碧落空江瘞鶴憶朱方詩囊取次傾珠琲一一清圓敵夜光

西京任庭瑞樂善齋

大鈞妙無心變化各有職元陽執樞紐羣動遂生息達人洞顯幽語默絕窺測
尸居碧窗曉觀萬養真寂春葩陽林秀衆采紛蕤蕤上有黃鸝鳴下有游鹿跡
嗒然遺世清至道在几席芝眉紫綸巾舉酒起玉色桐孫護清風竹母引白石
素心絕榮侈天爵實有得敦龐古遺民過里車已式願言表其閭庶以昭帝則

白雲閒齋

武當靈峯通廓寥下有白雲護山腰朝入寢扉結翠被暮宿丹井騰金瓢神君
握機不盈寸頃刻倒影旌幢飄道人夙昔慣所見更上岩嶢扶斗杓

送金華王生

不到金華洞于今二紀餘偶逢騎鶴客爲覓牧羊書芸笈秋消蠹萱堂暮饌魚
江湖易衰感暫且問樵漁

建昌李生城南別墅

雲樹黑微茫依稀見竹房山空遼鶴化市近海鷗藏逸興王官谷幽禪華子岡
展圖塵眼眯剩欲濯滄浪

開平第三集 辛酉

至治元年二月庚戌至京城壬子入禮闈考進士三月甲戌朔入集賢院
供職四月甲子扈蹕開平與東平王繼學待制陳景仁都事同行不任鞍
馬八日始達留開平一百有五日繼學同邸八月甲寅還大都得詩凡六
十二首道塗良勞心思彫落姑錄以記出處耳是歲八月袁桷序

次韻繼學途中竹枝詞

居庸夾山僧屋多鑿石化作金彌陀但看行車度流水不見舉拂談懸河
紅袍旋風漾金泥車前把酒長跪齊忽聽琵琶相思曲迎郎北來背面啼
氈房錦幄花簇勻酥凝疊餅生玉塵晚傳宮壺檀板急酒轉一巡先吐茵
土屋苦草成虜廡前牀翁媪後小姑我郎南來得小婦蘆笛聲聲吹鷓鴣
雲州山如五朵雲老松積鐵羅青春遂令古雪不肯化萬杵千爐煎貢銀
山後天寒不識花家家高曬芍藥芽南客初來未諳俗下馬入門猶索茶
寒風捲蓬沙轉黃駐馬問路路轉長紅衣簇簇入新市指點壚頭稱上方

朔雲蕩蕩愁燭龍土房擁被睡高春披衣上馬過前驛清霜急雪時相逢
瀛洲往歲侍宸居一度還家一度疎近行開平十二驛眼望南雁傳鄉書
闔闔雲低接紫宮水精涼殿起薰風侍臣一曲無懷操能使八方歌會同
四月二十六日曉霜

遠坡殘月露零零曉壓椒花玉作屏他年若向南州說疑是鄒生逞怪靈
戲題樺皮

碣裳新脫玉層層紅葉朱蕉謝不能擬製小冠韜短髮意行雲水一枝藤
望雲州

望雲州裏松花白金閣山前木葉丹駐馬搖鞭游不到還家寫作畫圖看
次韻薛玄卿南還題驛二首

思君月落見參旗碧眼微醺倍陸離北上開平復南去卻如返棹剡溪時
碧窗雲冷思萋萋曉榻黃庭眼未迷宜向山陰道中住聽風聽雨聽猿啼

次韻答陳明復

漢殿高懸五丈旗羽人朝奏佩江離綠章已徹蒲團坐正是金門月上時
碧雲深處草萋萋誰道桃源路已迷昨夜紫霄峯頂坐天雞子夜獨先啼

再次韻

行殿風高十二旗碧雲深處紫流離相如獻賦誰能繼有客瀛洲獨立時
烟籠沙磧凍雲萋錦簇椒花五色迷不是朝天騎馬倦寒雞自怯曉鐘啼

次韻李伯宗學士途中述懷

山巍磧瘳馬逶遲盡日雲陰變四時曉度桑乾雪新作倚松參坐鬪題詩
李陵臺下日遲遲惆悵河梁執別時漢武不知歌四牡十年競作五言詩
縈紆馳道屬車遲白髮微臣際盛時侍獵能追上林賦登臺願繼柏梁詩
紫禁天低夏日遲深紅芍藥勝春時共仰雲孫李學士樂府新填更進詩
內宴初筵舞尉遲榴花未吐艾花時宮詞久矣無王建把筆爭傳應制詩
鼇峯土冷菊花遲滴滴金明八月時留取東平老學士烹羊分韻酒催詩

端午謝吳閒閒惠酒

客裏端陽景物殊
侍晨分釀出偏壺
松間尚積千年雪
澗底難尋九節蒲
霏玉論陳醫國艾
研朱手寫辟兵符
侍臣陡覺蓬萊近
簇簇宮花徧藥珠

榆林

白榆天上生北塞
傳真種漢皇究邊略
感秋此為重神武
開帝京赤縣官曹擁
井邑生聚繁折戟
出耕壟考昔所種榆
禾黍日葦葦繁絃雜
伎部一一承天寵
感衰諒有時前山碧
雲涌

龍虎臺

羣山朝宸居層臺
納靈秀百泉暗東西
千嶂明左右沙磧水多伏流
先皇雄略深省方
歲巡狩翠華懸中天
問俗首耕耨沈沈貌
貅壘濯濯鷹犬數
前行節駝鼓執御
各在手侍臣仰天威
長跪四方奏往聞
父老言羅拜上萬壽
山桃與黍酒啟齒
時一嗅乘雲去無蹤
過者必稽首登坡望
儲胥紫氣徹牛斗

居庸關

扈蹕朝上京嚴裝戒
脩途首夏天宇肅寒
雲慘不舒足弱跨鞍
窘喋喋詢前途

縈紆入南口松籟吹笙竽在昔恃險隘當關守千夫一朝天馬來巖嶧成康衢
大統叶天運神武開皇謨信矣經啓功聿超神禹圖

桑乾嶺

茲山西北來旋轉十二雷昔人望鄉處生別何崔嵬我來坐絕頂雲漢森昭回
出日騰金鉦積露流銀臺長空不受暑雪華散皚皚氈車引繩過屈曲腸九迴
微蹤愧三至南望心低徊長風馬耳迅何當賦歸來

李老谷

層巒積明秀深崦罘罙圍千松受新雨一流珠璣少憩倚厓厂清湍激林霏
睡醒日亭午隔溪啼鴉歸昔有山水癖龜勉登王畿欣此澗谷幽亭亭白雲飛
素心儻自喻出處諒無違

龍門

蒼厓出雙闕羣山頰首尊陰風起晴雷摩盪晝日昏鐵峽擁偪仄百川爲之奔
疑下有龍湫逞怪躡天門滄兮出膚寸頃刻黃流渾側徑出石壁巨浸存遺痕

緬昔設天險事久難窮論征衣襲輕兩神君儼雲根

獨石

亂石各參布茲山以獨稱磅礴太素初星隕遺其形磊落絕衆附昂昂耿晶熒
此土積陰沍草木無光精疑有華表人宴坐陳廢興前車何繩繩去馬何騰騰
問之了不應油然白雲升

曉發

蓐食慎王事曉星當前戶跨馬官道行細草泣寒露亂石鳴琮琤啼鳥守荒樹
行行未十里問堠坐當路年衰脛力拘望遠彌窘步天風捲飛蓬白日互吞吐
深知非世才歸耕誓先墓

合門嶺

寒沙高岡聚積溜開土門地媪神功奇茲焉奉帝尊先皇歲巡幸屬車爛華軒
令巖植前茅高下相攀援魚貫別後殿蟻行定前屯飛丸落千尺瞥裂驚危輶
履險深自持人情戒居安寒雲蔽出日去去踰前村

赤城

茲山浴曉日牆壁流丹砂昔聞天台峯云受珠宮霞地氣有南北變化無殊差
埴墳登禹書頽壤勞民嗟感彼山上松黑鐵留槎牙形色有正性染入徒增夸
至今溫泉下金鼎烹靈芽

灤河

近山馬昂髮遠山鳳騰羽百谷奔亂流屈曲長蛇赴維時雨新過急溜槽牀注
居人匯爲井千屨集沙步寒光澄玉膏甘冽過牛乳茲泉成白溝巨浸合沮洳
蓮芡充餼糧魚蝦足租賦塞翁話疇昔陋彼成險固往事不復論汙汙日東去
次韻虞伯生墨竹畫壁

墨雲參差平地湧碧窗浙瀝寒風生截爲崆峒白玉管螭龍夜嘯幽凰鳴六月
雪花飄上京崢嶸直與星斗平出門忽作江海興推枕先聞金石聲

楊花曲

上都楊柳瘦且堅葉葉不展圓如錢年年飛花作端午遠客乍見心茫然上都

飄雪不知數此花與雪相旋舞黃鸝聲絕孤雁鳴萬騎千車互來去手攀短條
心欲絕宛轉成球恨初結寒風飛蓬捲車輪點點相亞隨明滅南鄰蕩子衣夜
單曉望出日如黃綿辛勤掇拾不敢棄願刮龜毛同作氈

伯宗學士悉和鄙作唐律敘謝

峨冠疎髮老詞臣筆底花飛點點春千里關山勞夢寐百年泉石換精神蕪城
賦罷生新恨夔府詩成歎絕塵更有御園紅芍藥生香一曲柘枝新

四月廿一日與繼學同出健德門而伯庸以是日入都城作詩寄之

二子出北門一客南門來燕鴻兩相避矯首氣崔嵬客有百和香我有蒲萄杯
把杯客不見我心爲之灰願留百和香以待二子回

乞酒潘景梁學士

長夏蕭齋學晝眠鰲峯深處酒如泉山瓢從此通來往準擬宮袍不上船

次韻繼學

急電散晴雪仲夏天氣清閉戶北窗坐稍稍新月生客至設棊局言忘遺世情

盡日無王事白雲與簷平

重午聯句

夏峯表奇雪天京候端陽寒襲宮羅輕瑞登水鏡光烏輪麗北陸龍舟競南湘
蠅虎逞王國蜥蜴嚴帝房事訛汗習陋風烈墟壤剛擁貂繫綵絲飛鞭賭瓊漿
帶重公莫舞簪飄艾如張雁分列瑤席魚貫登紫廊白乳謝角黍青蒲截鵝肪
重離天門正習坎地軸方靈符瑩丹砂羽箭穿白楊戀闕葵日傾懷家麥秋涼
羹臯傳太官懸虎步天罡鳴噤百壬斂蠢動九子昌截薛翠屏偃浩漭白海長
扇藏婕妤泣標聳飛廉忙紅苞當階藥碧縷雕盤香宮花金抹額廢仗玉鏤錫
鈴催寶貼進拍奏霓裳揚舉鼎凝脂膏載車實餽蒲萄漱灑瀉琵琶宛轉傷
蟾蜍 未乖驪鬪裘難藏伏日奩果貢薰風鑑冰洋瀛洲畏獨往玉署思同翔

裝馬曲

綵絲絡頭百寶裝猩血入纓火齊光錫鈴交驅八風轉東西夾翼雙龍岡伏日
翠裘不知重珠帽齊肩顛金鳳絳闕蔥曠旭日初逐電迴飈斗光動寶刀羽箭

鳴玲瓏雁翅卻立朝重瞳沈沈樓殿雲五色法曲初奏歌薰風酈官庭前列千
斛萬瓊蒲萄凝紫玉駝峯熊掌翠釜珍碧實冰盤行陸續須臾玉卮黃帕覆寶
訓傳宣爭頰首黑河夜渡辛苦多畫戟雕閤總勳舊龍媒嘶風日將暮宛轉琵琶
前起舞鳴鞭靜蹕宮門閉長跪齊聲呼萬歲

嘉禾圖

土膏滲陽春連畛垂黃雲仁聲九垓被地瑞昭人文穰穰大同郡嘉穗表奇芬
擢莖秀雙歧駢首誓不分稔聯珠琲光苞簇綬受紋老農善視之神化非耕耘
維皇調玉燭歲功合氤氳帝力畎畝深擊壤歌放勛圖成上金匱寶軸森香芸
侍臣丹筆工秉心述前聞願旅天子命補亡追典墳

蘇武牧羊抱雛圖

寒氈齧盡節旄稀野曠風低短草肥忽見嬋娟新月上卻疑身似夢中歸

李仲賓墨竹圖

筆底玄雲冰雪姿瀛洲玉佩映參差如何昔日閭中令晚歲羞稱老畫師

開元恩長老以詩送北禪講師游上京末章見及見余于灤陽次韻
乘槎親見玉繩流底用蒲萄與海榴紫塞接天星戴斗白雲垂地水浮漚蠅頭
可但窮三藏塵尾懸知又九州問訊開元老禪伯詩瓢今向太湖浮

王澹游墨竹

陰陰密葉鐵鈎鎖淡淡疎柯水玉簪客向流離渾老盡臨風題筆望江南

次韻繼學竹枝宛轉詞

長年久客學吳儂應對嫦娥認妾容聞道秋來三十日雪花飄處似深冬
聞郎腰痠寄當歸望盡天邊破鏡飛昨夜燈花圓似粟倚門不肯送郎衣
宮羅疊雪燃金龍郎去香奩手自封還家貂裘綿百結教妾今年兩度縫

年年河鼓度天津郎在灤陽見得真今夕定知郎到日桂華浮魄滿香輪

約八月十八

五日抵京

陳景仁都事以詩惠酒次韻

閉門擁膝絕知聞壞壁行蝸古篆文誰遣白衣傳剝啄新詩如雪酒如雲

短髮藤冠似晉賢瀛洲獨坐思如泉明知白眼輕餘子客至題詩視屋椽

贈翰林何生

殘月疎星送曉鐘伊吾聲徹烟雙瞳盛年事業須黃卷盡日交游謝碧筒案上蟾蜍承夜露門前叱撥立秋風君家居士多陰德佇看雞翹列殿中

嗣天師墨戲四絕

橫塘野色深聳身對秋水守獨匪自夸感彼蜻蛉子枯蓮孤鴛

守雌氣之母見一道之宗配合貴有得丹光結芙蓉枯蓮鴛鴦

二禽詎無知秋聲起天外蘆枝為我旌蓮葉為我蓋蘆荷水禽

萬籟日惻惻水花澹無蹤孤鴻招不來泛泛以自容蘆荷孤鳧

果老圖

御氣如嬰兒變化能成形再過趙州橋滅跡絕怪靈